

ممنوع الضحك

د. حنان لاشين
(أم البنين)

دار البشير
للثقافة والعلوم

ممنوع الضحك

د. حنان لاشين (أم البنين)

الطبعة الأولى

2015

التنسيق الداخلى والإخراج: إسلام الحمماقي - 01156292096

رقم الإيداع: 2015/9401

ISBN : 978 - 977 - 278 - 484 - 4

جميع حقوق الطبع والنشر محفوظة للناشر
فقط وغير مسموح بإعادة نشر أو إنتاج
الكتاب أو أى جزء منه أو تخزينه على أجهزة
استرجاع أو استرداد أو تسجيله على أي نحو
بدون أخذ موافقة كتابية مسبقة من الناشر



للنشر والتوزيع

ت: 01152806533

01012355714

darelbasheer@hotmail.com

darelbasheeralla@gmail.com

دار البشير للثقافة والعلوم



سورة الاحقاف


■ ■ ممنوع الضحك ■ ■

بِسْمِ اللّٰهِ الرَّحْمٰنِ الرَّحِیْمِ

إهداء

إلى البسطاء، أصحاب القلوب البيضاء.

■ ■ ممنوع الضحك ■ ■



■ ■ ممنوع الضحك ■ ■

مقدمة

جرب أن تراقب طفلا يضحك وستضحك.
جرب أن تراقب نفسك وأنت تأكل وستضحك.
جرب أن تراقب ثناؤب رضيع وستضحك.
نضحك أحيانا على أنفسنا،
ونضحك أحيانا دون قصد على أخطاء الآخرين،
ويضحكننا الصغار ببراءتهم،
والبعض ينتزع منا الضحك بتلقائية وفن،
وقد نصاب أحيانا بعدوى الضحك.
عندما نضحك فجأة، نحن نفتح أبواب السعادة لتتنفس أرواحنا.
سنصف مواقفنا نعيشها في حياتنا اليومية في كل البيوت، وبعض

■ ■ ممنوع الضحك ■ ■

الحوارات الزوجية، والكثير من السلوكيات الخاطئة التي لا ننتبه لها أحياناً في المسجد وأحياناً ونحن نزور الآخرين، وقد نتحدث عن اختيارك لنصفك الآخر.

ولكن....عندما نتحدث عن «حصاد الغربة»، وآلام الوطن في صباح مشرق، حتماً سيكون الضحك ممنوعاً للحظات ولكنها لن تطول!
من فضلك

اضحك معنا فأسنانك ليست عورة
ولا تصدق أبداً أن...«ممنوع الضحك»

* * *

1

إزاي تبسط مراتك

1 - "ابتسم وأنت تفتح باب البيت فشكلك أجمل وأنت مبتسم"

(اعمل نفسك متفاجئ بالولاد وحاول تكون مبهج، هي أصلاً كانت

هاتعجنهم وأنت لحقتهم)

2 - "قول لها ومستيني إيه الشياكة دي"

(ما تدققش لو لسه لابسه نفس الفستان بتاع أول إمبراح.. قول

وخلص وهي هاتفهم وتلبس واحد جديد)

3 - "استرها وما تقولش لحد على غلطاتها".

لو في يوم حرقت صينية البطاطس خليك ستر وغطى عليها

وافتكر لها طاجن البامية اللذيذ بتاع السنة اللي فاتت وسامحها ما

كلنا حرقنا البطاطس.

■ ■ ممنوع الضحك ■ ■

4 - "ساعدنا في شغل البيت"

لو لقيت تراب على السفرة هات فوطة ولمع علشان تكسفها..أأ..
قصدي أو ارسم عليه قلب وسهم وحرف اسمك واسمها وسيب التراب
وهي بعد كده هاتأخذ بالها.

5 - "أديها مصروف تجيب بيه اللي نفسها فيه وخصوصاً لو
مش بتستغلك.. بيغيرق قوي"

(حتى لو جابت بيه جيلي كولا ما تناقشهاش)

6 - "أكتب لها جواب ولو مرة كل شهر"

(حسن خطك وحطه في المطبخ علشان تتأكد إنها هاتشوفه
أول ما تصحى من النوم..

أصلها بتقوم فوراً من السرير على المطبخ علشان تأكل أأ.. قصدي تطبخ)

7 - "طببط عليها نزي الألب ما بيطببط على بنته...الست

رقيقة بتحتاج كدة"

(بس مش وهي بتصرخ للعيال.. مش وقته.. طببط عليها بعد

■ ■ ممنوع الضحك ■ ■

ما تقدم لك صينية الكنافة وتخلص شغل البيت وتقعّد ترتاح.. ساعتها
بتبقى مهدودة فعلاً)

8 - «اشكر فيها قدام أهلك»

(ما تجيبش سيرة التراب اللي على السفرة)

وفي أخلاقها وطبيخها

(انسى صينية البطاطس)

وصبرها على العيال

(حاول تنسى صوت صريخها وهي بتغير لابنك)

وشياكتها

(بغض النظر عن العباية البرتقاني أم كسر)

9 - «ما تقارنهنّش بحدّ علشان هيّ ما تقارنكش بحدّ»

مش لازم تحكي عن زميلتك في الشغل الباشمهندسة فوزية

والدكتورة حسنية

■ ■ ممنوع الضحك ■ ■

وتشكر في شخصيتها وترغي وهي قاعدة في البيت منقطعة عن العالم
وضحت بطموحها الدراسي وطالع عينها وفي الآخر تشكر في
عنايات وهي قاعدة عيب ما يصحش.

10 - «امكي لها عن يومك ما جات يمكن بالنسبة لك بسيطة

بس هي لما بتعرفها وتلافيك بتحكي بتحسها بالأمان»

الستات بتحب الأخبار (فراغ) سيبها تعيش دور المحقق كونان

وجاوب على أسئلتها

11 - «خرمها مرة كلك أسبوع»

الحبسة في البيت بتخفق..أو اسمح لها تزور صاحباتها

12 - «اشكر في أهلها حتى لو مش بتحبهم.. دور فيهم على

أي حاجة حلوة»

13 - «هاتلها ورد»

بلاش دباديب دول للمخطوبين بس.. وهاتلها شوكولاتة..حلوة

الماندولين»

■ ■ ممنوع الضحك ■ ■

14 - «افتكر أيام الخطوبة»

15 - «لما تتعب وتسخن ارقبها وادعي لها واعمل لها

ينسون واظهر شوية تعاطف»

(حاول تخبي فرحتك)

16 - «لو خارجين واشتريتوا حاجة ما تشيلهاش كل الأكياس

كفاية عليها كيس»

بالله عليك.. هي أسيرة عندك وكانت فرحانة بيك وعشمها فيك

كبير، فما تخيش ظنها وحطها في عينك واتق الله.



■ ■ ممنوع الضحك ■ ■

2

أفكار رومانسية

عزيزتي حواء ركزي معايه
عيشي مع زوجك لحظة حلوة..
بس ما تقفيش على سور البلكونة وتقويله تعالى نعمل زي
تايتانيك، هايزقك ويقول انتحرت
مافيش تايتانيك وأصلا الفيلم متصور في طشت.
(بس ممكن تتفرجي معاه على صور خطوبتكم)
ابعتي له جوابات حب وعطريها بالبارفيوم اللي بيحبه
بس ما تكتبيش على ورق (بحبك) وتطبقهم مربعات
وتحطيها له في الرز.. علشان وهو بياكل يلاقيها يروح مطلعها

■ ■ ممنوع الضحك ■ ■

ويقراها ويفرح

هييلعها وتقف في زوره وأنت حرة

(اكتبيها في جواب وخطيها على السفرة جنب الطبق)

♥ رتبي أمورك ونظمي وقتك واخرجي معاه

بس بلاش تقويله لما تروحووا مطعم اسحب لي الكرسي وقعدني

الأول لأنه منتظر الفرصة دي من زمان وهيوقعك علشان يبقى بيهزر

معاكي ومش حارمك من حاجة

(اقعدني قدامه علشان مايشوفش غيرك ونفسه تتسد.. أأأ. قصدي

علشان يشوف نفسه في عيونك وابتسمي)

♥ لما يدخل من الباب مسيه إنك فرمانه بدخلته.

بس بلاش تعيشي الدور وتلبسي الجيبة أم كرانش وتنططي

وتغني أهلاً أهلاً بالعيد لما يرجع من الشغل.. هيتصدم ويقفل الباب

تاني وهي تغدى لوحده في كنتاكي.

(البسي فستان شيك وسرحي شعرك بطريقة حلوة)

■ ■ ممنوع الضحك ■ ■

❖ مسيه إنه غالي عليك

بس بلاش تقلبيها دراما وتقويله وأنت بتعيطي أنا بحبك ومش عارفة لو جرى لك حاجة هاعمل إيه من غيرك أنا والعيال.. يا نكدية
(اضربي واحده سنيكرز..أنتِ مش أنتِ وأنتِ جعانة).

❖ مطي فائزة فيها ورد على السفرة

بس بلاش تقطعي الورد وتعمليله طريق من باب الشقة لحد الطبلية..أأأ.. قصدي السفرة، ابنك اللي بيزحف هيفتكه حاجه تتاكل وهياكله وهيجيله إسهال

وأنت اللي هتسهري بيه.. بلاش الورد
(خدي بإيده وامشي معاه لحد السفرة).

❖ الإضاءة الرومانسية

بس بلاش العشاء على أضواء الشموع مهما عملتي مش هتداري غلطتك هيعرف إن الفرخة لزقت في الطاسة وأنت بتحمريها واتهرت..

■ ■ ممنوع الضحك ■ ■

أكلية في النور.

(الأباجورة.. إضاءة رومانسية).

♥ اعمليه مفاجأة تبهره

بس بلاش تفاجئيه وتروحيه الشغل..

لو دكتور.. هيقول دي مريضة عندي

لو محامي.. هيقول زبونة ولها قضية

لو مدرس.. هيقول والدة تلميذ فاشل عندي

على ابنك

لو مهندس.. هيقول لقيتها في الموقع تحت العمارة اللي اتهدت

لو ضابط.. هيقول دي مجرمة أنا قبضت عليها وهيوديكي السجن

(خليكي في البيت أحسن).

♥ بلاش تستخبي ورا الستارة علشان يلقوك ويدور عليك..

أولا: هيتسرع

■ ■ ممنوع الضحك ■ ■

ثانيا: مش هيدور عليك أصلا وهتفضلي ورا الستارة.. بلاش

♥ إديله أكبر مة نبي الفرخة

أكله قبل ما تاكلي

غطيه لما ينام وطبطني عليه

خليكي حنينة

ووطي صوتك

وبلاش الشبشب أبو كعب في البيت.



■ ممنوع الضحك ■

3

احترس من المرأة

عندما تراقب زوجتك، ستلاحظ أنها تكرر بعض العبارات، فلا تهملها... واحترس فأنت في خطر..

⊗ كنت فين؟

جملة خاطفة تخرجها الزوجة بمهارة وهي تجلس بهدوء مصطنع على كنبه الأنتريه بعد تأخر الزوج وتأكدها أنه كان يضحك وهو واقف مع زميله في الشارع ساعة ونص وهي قلقانة (ننصح بالاتجاه فوراً لأحد الغرف مع اصطحاب الأطفال وغلق الباب حتى تهدأ).

⊗ يا بختك

جملة حقودة موجهة للزوج وهو يستعد للخروج مع رفاقه لمشاهدة الماتش في النادي..

■ ■ ممنوع الضحك ■ ■

⊗ الصمت

الصمت شيء مقلق ويسبق العاصفة وتصاحبه آثار سلبية

تظهر بوضوح على الأبناء

(محتاجين يستحموا)

والمطبخ

(المواعين ماتغسلتش)

نصح في هذه الحالة بالمسح على رأسها بحرص والطبقة على

كتفها بحنان

والسماح لها بالبكاء

(خلاص هي ضربت وكان لازم تفصل علشان تقدر تكمل)

⊗ عاوزة ورد يا إبراهيم

جملة تكررهما المرأة عندما تفتقد الرومانسية

(هي مش مجنونة ولا نسيت اسمك هي شافت الفيلم بتاع هند

■ ■ ممنوع الضحك ■ ■

صبري..

لازم تجيب ورد حتى لو اسمك مش إبراهيم).

⊗ رِبْطَةُ النِّينِجَا

هي رِبْطَةُ للرأس تجيد الزوجة لفها بمهارة على رأسها
مع عقدها من الأمام على شكل فيونكة ونلاحظ كبسها على الجبين
فتظهر العينان بشكل ضيق لكنه يسمح بالرؤية
(نصح بتكرار كلمة سلامتك يا حبيبتى كل دقيقتين مع التأكيد على
تناول حبايتين بانادول ومج نسكافية وشوكولاتة جالاكسي
والصبر لحد ما الصداع يروح).



4

عبارات تسمعيها من زوجك

🍏 «معان»

نداء عاطفي يطلقه الزوج فور دخوله البيت ويلاحظ تشوش في الرؤية وظهور علامات الإرهاق والتأثر.

(ننصح بسرعة الغرف والقلبي والتحمير حرصًا على سلامة الزوجة ونبشركم بعدم انتباهه لغياب الملح في الأكل لأنه جعان) وما تقوليلوش ساعتها إيه رأيك في تسريحة شعري.

🍏 «أنا رابع أنام»

جملة تحذيرية قد تظهر بصيغة إخبارية (بس هي مش كده خالص) يلاحظ فيها رفع وتقوس الحاجب الأيسر وإشهار إصبع السبابة أمام وجه

■ ■ ممنوع الضحك ■ ■

الأطفال لكنها في الحقيقة موجهة للزوجة..

علشان تبطلي تسرسي كل شوية وتقولي للعيال وطوا صوتكم

بابا نايم)

«الساااي» 🍏

صرخة رعدية تسمع على المغربية بعد استيقاظ الزوج من النوم العميق.

(نصح بالاتجاه فوراً إلى المطبخ وإعداد الشاي وترديد أذكار المساء)

«آاااا» 🍏

حروف مبعثرة تخرج عفويًا من فم الزوج مع هز الرأس وارتعاش

الجفن الأيمن مع ضيق العين وازرقاق الشفتين عندما تبدأ الزوجة في

الشكوى من أخواته يتبعها عاصفة رعدية.

(ما تقوليلوش دول اخواته...مهمن كان..عيب)

وابقي خلصي حقلك من إخواته البنات أول بأول في ساعتها

على طول واللي تشد لك شعرك شدي شعرها وخالصين

وطبعًا لو سامحتي أحسن وخلي قلبك كبير.

■ ■ ممنوع الضحك ■ ■

🍏 «مسن عاوزه حاجه من بره؟»

رسالة sms قد تبدو رومانسية لكنها انتقامية تحذيرية تصل على

هاتفك النقال

(علشان تبطلي تنزيله تاني يجيب البامبرز بعد ما طلع السلم يا

مفترية)

🍏 «ليه؟»

سؤال استنكاري! استفهامي؟

بعد طلب الزوجة ل ألف جنية علشان تجيب عباية جديدة لفرح سامية.

(في هذه الحالة رجاء القبول بأي مبلغ وكفاية تجيبي طرحه جديدة

وطرزي العباية اللي عندك بزراير بيجامته الكحلي)

🍏 «بأقول لك إيه»

مع مد حرف الياء.. جملة رائعة تنهي الحوار فجأة وتؤدي إلى هرب

الزوجة مع سماع صوت عجيب

■ ■ ممنوع الضحك ■ ■

وهي تنسحب من أمامه مصدرة صوتاً لولبيّاً..هيءإهيءإهيؤأأ
(ده صوتك أنتِ لما تنوي النكد يا حبيبتى عارفاكى أنا عارفاكى)

🍏 «وبعدىن بقى! اللهم طولك يا روح»

(ده لما تطولى فى النكد)

«ياااه أخيراً»

لأ..لأ...مش بيقولك، أينعم هو فرحان بس هو أصلاً ما خدش باله

إنك سرحتى ولبستى شيشب..

(ده الأهلى جاب جون)

🍏 «أنا بحبك»

«وأنت أجمل ست فى الدنيا وباعيش معاك أجمل أيام حياتى»

(وفى الحالة دي خلاص تأكدي إن صينية البسبوسة طلعت تحفة...)

تسلم إيدك).



■ ممنوع الضحك ■

5

ألو . . بحبك

♥ (قبل الجواز أيام كتب الكتاب)

هي لابسه بيجامة صفرا مرسوم عليها تويتي وبتتفرج على صور
الخطوبة

وهو قاعد في البلكونة ولبس التي شيرت البرتقاني وبيشرب شاي
والجو جميل

هو: ترررررن

هي: آوو

هو: إزيك يا حبيبتي

هي: إزيك يا حياتي

■ ■ ممنوع الضحك ■ ■

هو: أنا جاي النهاردة...مش مصدق
هي: ولا أنا... ما تنساش باحب أشوفك بالتي شيرت الأورانج اللي
عليه زرافة
هو: يا ريت تلبسي الفستان الفحلقي اللي له ديل وجناحات
وارفعي شعرك لفوق علشان قفاكي يبان.
هي: بس كده... حاضر من عيوني.
هو: خلاص أنا رايح ألبس وجاي حالاً أهه.
هي: وأنا رايحة أعمل لك كيكة الجزر بالشوكولا...
هو: طب ياللا اقفلي علشان مش قادر أقفل السكة في وشك،
خايف أقفل على مناخيرك.
هي: لأ. اقفل أنت الأول.
هو: لأ. إنتي.
هي: لأ. بليز إنت.

■ ■ ممنوع الضحك ■ ■

هي: (بعد ما حطت المعلقة الخشب في شعرها)

أيوه مين

هو: كل ده علشان تردي كنتي فين؟

هي: هاكون فين يعني في المطبخ

هو: أنا في الطريق، اغرفي الأكل علشان بيرد شوية لاحسن ما

بعرفش آكله وهو سخن.

لأني ميت من الجوع وعايز أنام قبل الماتش.

وحطيلي البيجامة على الكرسي اللي قدام باب الشقة.

والشيشب على باب الحمام ونوري النور.

هي: حاضر، بس أصل...

هو: بس أصل إيه!!

هي: لسه الرز بيتشرب على النار وصينية البطاطس فاضل لها تكة

وتتسبك...والسلطة أهه خلاااص

■ ■ ممنوع الضحك ■ ■

يعني يا دوب ساعة إلا ربع كده.

هو: أمال أنت كنتي بتعملي إيه طول النهار؟

هي: ابنك مغلبنى ومطلع عيني.. آه ماتنساش تجيب البامبرز

لاحسن هو لابس آخر واحدة

وريحته طلعت وأنا مش راضية أغير له وخايفة يجيله تسلخات.

هو: مش كنت تقولي من بدري

هي: أأ.. ألو.. قفل السكة في وشي... يا غلبي ياني.

هو: لا ماقلتش... أنا باحبكوا قوي.

هي: يااااه.. أخيراً.. فاكر أيام خطو... ب... أأ... ألو... أنت قفلت السكة

صح النوم... الجواز مسؤولية



■ ■ ممنوع الضحك ■ ■

6

رمضان كريم يا ستات

- الستات والبنات

اللي رايعين يصلوا التراويح في رمضان القادم
إن شاء الله

بلاش علبة الكيك وصنية الكنافة

وترمس الشاي مش لازم تاكلوا بين الصلوات كلوا لما تروحوا.

(عارفين إنك شاطرة)

بنتك الصغيرة فرحانة بصوتها

زي أصالة وماجدة الرومي

وبتغني في المسجد وتنط على راس البنات وأنت بتصلي

وابنك اللي بيسنن سخن وبيصرخ، الظاهر سنانه بتاكله والناس مش

بيسمعوا الإمام.

■ ■ ممنوع الضحك ■ ■

(اتفقي مع جارتك، أنت تصلي في المسجد يوم وهي يوم واقعدوا
بالولاد وارحموهم)

مافيش حاجة إسمها محجوز، ما تحطيش الشنطة جنبك وتبرقي
للبنات وتقولي محجوز

وتستني جارتك على بال ما تخلص المواعين وتيجي
(المسجد مش أوتوبيس)

بالنسبة للغلبانة اللي جنبك
مش لازم صباغك الصغير يلزق في صباغها لو بعيدة وبطلي
تزغزغيها.

رجليك شكلها كده غلط وشكلها وحش وهم بعاد قوي عن بعض.

(مش هاتستحملي وهاتقعي في الآخر)

ما تطلعيش تجري بعد الصلاة بالخمار علشان تلحقي المسلسل
من أول المقدمة وتتفرجي على الرقاصة.

(فايدته إيه مرواح المسجد)

بلاش تلبسي العباية اللي بتلمع وتبرق بالترتر والخرز لأنها بتنور في

■ ■ ممنوع الضحك ■ ■

الضلمة والناس بتتخض.

(ده مش لولولويييي فرح)

بلاش تنزلي تصلي بالإسدال بتاع البيت قماشته خفيفة وبيبين
الجسم.. إلبسي أحسن عباية عندك.

(إنت مش طالعة تنشري في البلكونة يا شلبية)

بطلي تبحلقي في البنات

وتدوري لابنك على عروسة وتنادي عليهم بصوت عالي.

(بصي من تحت ل تحت)

وأوصيك بالبنات الهادية الرقيقة اللي على طبيعتها ومش حاطين

مكياج وبيقعدوا ورا)

جاركم أبو أيمن عرف كل حاجة لأنه سمعك في المسجد

من ورا الستارة

وإنت بتحكي لصاحبتك على مقادير الكنافة بالقشطة والمكسرات

(ها يقول لمراته وحاتعرف سر المهنة وطي صوتك)

■ ■ ممنوع الضحك ■ ■

بلاش يا بنات الكعب العالي
لأنه ملفت.. ويعمل حاجات وحشة.
(تريك تراك تريك تراك قدام المسجد والمصلين واقفين ها يبصوا
غصب عنهم ويتفرجوا)
روج وكحل وأحمر خدود وإنْت رايحة تصلي..
ليه!
(يارب الإمام يخشع في الدعاء وتعيطي والكحل يسبح)
البارفان بلاش منه في المسجد
وعلى فكرة ما فيش واحد ها يشمه يقوم يحبك فجأة
ويجري وراك وإنْت طالعة من المسجد علشان يخطبك من بابا
(اللي بييجي في الإعلانات كله كذب)
لو الفطار كان فيه فتة وخل توم خليك مكانك ما تتحركيش من
البيت وهاتولها هدية
آميين

■ ■ ممنوع الضحك ■ ■

الرجالة اللي يعلوا صوتهم فيها
إنت صوتك حلو وناعم ومسمسم
وده مسجد
وبلاش أوبرا عايدة
قولها بصوت واطي
علشان ربنا يكرمك
في السجود إدعي في شرك

المسجد كله عرف إن ركبك بتوجعك وجوز أختك ضربها بالقلم وإنك
بتدعي عليه بطلوا تتعاركوا على النور وشوية تطفوه علشان الخشوع
وشوية تنوروه وتدوروا على العيال وما تنسوش تنضفوا المسجد وبلاش
ترموا مناديل ورق في الأرض علشان ده بيت ربنا.

وحشنى رمضان.

اللهم بلغنا رمضان



■ ■ ممنوع الضحك ■ ■

7

رمضان كريم للرجال

بمناسبة رمضان

الإخوة والشباب اللي رايعين يصلوا في المسجد

ما شاء الله ربنا يزيد ويبارك

ممنوع منعاً باتاً تروح المسجد بالشراب اللي كنت لابسه طول النهار

واتعمى تراب وبعدين مسحت عليه والمية والتراب والهوا عملوا

جريمة أنت كده "طاغية"

في ناس بتصلي في الصف اللي وراك وممكن تحصل إغماءات

في إختراع اسمه "عطر" وأحياناً يدعى «بارفان» وبينادوه في بعض

العائلات «كالونيا» يا ريت تستخدمه علشان تسعد الناس وتداري الأحران.

■ ■ ممنوع الضحك ■ ■

الصنادل والشباشب اللي بتركن على باب المسجد بطريقة عشوائية
وتكعبل اللي رايح واللي جاي
وفي الآخر تتعاركوا على الشباشب اللي شبه بعض وأنتم مروحين..
رصوها بنظام.. كل شبشب جنب أخوه علشان الزحمة
ولو ما فيش مكان ممكن الصندل يركن صف ثاني
وممكن حد من الشباب يتطوع وينظم المرور
اللبس اللي حضرتك قاعد بيه طوال النهار (الترينج المخطط)
ونمت بيه، وصحيت بيه، وأكلت ابنك حمادة بيه، والشوربة وقعت
عليه وبقعته، ما ينفعش تروح بيه المسجد لأن ريحته طبيخ وعرق،
إلبس أحسن لبس عندك وانت رايح المسجد.
لو مدام «شلبية» أبدعت في الفطار النهاردة، وفي قنابل وامتفجرات
في المحشي يبقى أنت «إرهابي»، والكوارع كانت ممتازة والخل والتوم
والفتنة كانوا حكاية بلاش تنزل
أو أجلهم بعد التراويح رفقا ورحمة بالمصلين

■ ■ ممنوع الضحك ■ ■

انزل بدري مش لازم تتأخر على بال ما برنامج المسابقات يخلص أو شيكابالا يجيب جون والإمام يكون بدأ الركعة الأولى ودخل في السورة اللي بعدها، وتجري في الشارع علشان تلحقه قبل ما يركع، رمضان مش بيجي كل يوم.

وكده كده مصر مش ها تلعب في كاس العالم ريحوا نفسكم.
الشباب الصاعد، بلاش البنطلون الهابط، والسلسلة والأنسيال، وبلاش تلبس ال تي شيرت اللي عليه صورة مادونا وأنت رايح تصلي التراويح أكيد لازم تركزن العربية وتلحق الصلاة بس بلاش في وسط الشارع الناس ها تدعي عليك، وممكن حماتك تتعب والإسعاف تيجي ويكونوا عاوزين يعدوا من الشارع ده تحديدا لإنقاذ حياتها بعد ما ضربت صنية الكنافة لوحدها والسكر على، اركنها بعيد أو روح مشي وما تضايقش الناس وتسد الطريق، وساهم في إنقاذ حماتك.

بعد ما تصلي وحضرتك واقف منتظر المدام مش لازم تبين لها إنك قلقان عليها قوي وبتدور عليها في وشوش كل الستات، وقال إيه

■ ■ ممنوع الضحك ■ ■

فوق رقبة اللي قاعدين وتاخده بالحضن وتسأله عن سوسن هي خلاص
إتجوزت وها تولد وألف مبروك، واقعد إسمع الإمام.
اعمل الموبايل صامت، أو طففيه خالص واكتمه، وما تطلعوش تلعب
Games بين الركعات ولا تبعت رسايل لحد، وبلاش رنة غير لائقة في
المسجد،

ويا خوفي.. يا خوفي... لتكون الرنة عشرة بلدي
وكل سنة وأنتم طيبين.



■ ■ ممنوع الضحك ■ ■

8

عبقرية الستات

إحنا كستات عباقرة الحقيقة واخترعنا أكثر من لفة للطرحه..

الحجاب الفرعوني

وده عبارة عن شوية طرح فوق بعض على شكل هرم وبتظهر البنت لو قصيرة من أسفل الطرحه بشكل ملحوظ والطرحه دي ما بتتحركش حتى لو في رعد وبرق وبتدفي في الشتا.

حجاب شم النسيم

وده حجاب مبهج ويوحى بالسعادة والفرحة شبة فساتين صفاء أبو السعود الجميلة كده بس للأسف في أحياناً جرس بيرن في ديل الطرحه (آه والله جرسن وبييرن)

■ ■ ممنوع الضحك ■ ■

علشان لو أنت بتحود من على الناصية بالعجلة هي تهز راسها وترن
الجرس تقوم إنت تسمعها ما تخبطهاش.

مجاب سوبر مان

وده بيركوله من فوق وشاح زي بتاع سوبر مان وببشبتوه بدبوسين
على الراس من على الجنبين
وها تلاقيه بيطير وراها

(لو مراتك وزهقان منها اشتريهولها وزقها من البلكونة وقول إنها
كانت بتقلد سوبر مان)

مجاب البننت المقموصة

وهي بصراحة مش مقموصة ولا زعلانة من حد ولا متكبرة ما
تظلموهاش

هي بس خايفة تهز راسها فوق وتحت وتقول أهلا وسهلا إزي حضرتك
وما تقدرش تبص يمين لما تنادي عليها وتقول أيوه لأن رقبتها ها تبان
والطرحة يا دوب خنقاها ومدخلاها في رقبة الفستان بالعافية.

■ ■ ممنوع الضحك ■ ■

الحجاب الفسفوري

وده مفيد جداً لو النور اتقطع وإنّتوا في الشارع حاتعرف مراتك على طول وممكن تنشّن على دماغها وتحذفها بأي طوبة وآهي فرصة وما حدش شايفك.. وأول ما النور يبجي بلاش تفرح وتقول هيبويه لأنها هاتعرف.

حجاب صندوق الدنيا

وهنا ها تلاقي مفاجأة تحت الطرحة علبة سمّنة روابي

أو علبة آيس كريم فاضية

والنوع ده مفيد جداً

لأن ممكن تشيلي فيها أي حاجة

الموبايل مفاتيح العربية سندوتشات وممكن كتاكيت

(كتاكيتو بني)

عبقرية دي واللا مش عبقرية يا متعلمين يا بتوع المدارس؟



■ ■ ممنوع الضحك ■ ■

9

شايفاك

أيوه... هي شايفاك
شايفاك وأنت بتكور الشراب وترميه تحت الكنبه.
شايفاك وأنت بتعمل نفسك مش واخذ بالك من قشر اللب اللي
وقع في الأرض.
شايفاك وأنت بتقول لها بحبك والأكل ها يقع من بقك
(مش لازم تقول لها وإنتوا بتاكلوا)
شايفاك لما رجعت من الشغل وأنت بترمي القميص وتحذف الجزمة
(ها تخبط في وشها على فكرة كانت واقفة وراك)
شايفاك وأنت بتاكل الزبادي اللي بالفراولة

■ ■ ممنوع الضحك ■ ■

(هي قالت لك تأكله لبنتك مش إنت اللي تأكله)
شايفاك وأنت صاحي من النوم وشعر راسك مسافر وخدودك وارمة
شايفاك وأنت بتتفرج على نشرة الأخبار
(وإنت مركز مع المذيعة، استني لما المذيع يبجي واتفرج)
شايفاك وانت بتاكل بطيخ
(اعمل نفسك مش شايفها ولا يهملك دي مفترية وبتعمل أكثر من كده)
شايفاك وأنت بتجري على الموبايل قبل ما هي تمسكه علشان
تفتح رسائل صحابك
(بتعايبوا على الستات ليه في النكت)
شايفاك وأنت بتتفرج على صور خطوبة نيفين بنت خالتك
(كانت فاكة الحجاب ارمي الصور بسرعة)
شايفاك وأنت بتبص لعيون زميلتك وأنت بتكلمها لما زرتوهم في البيت
(حاول دايمًا تبص للنجفة لما تكلم ست قدام مراتك)

■ ■ ممنوع الضحك ■ ■

شايفاك وأنت بتتفرج على ماتش الأهلي والزمالك وبتبرق للعيال
وهي بتعدي من قدام التلفزيون وإنك بتتفرج
(أبو تريكة جاب جون)

شايفاك وأنت بتعد الفلوس من وراها
(هات لها هدية)

شايفاك وأنت بتدعي عليها..أااا.. قصدي بتدعي لها بعد صلاتك
شايفاك وأنت بتداري فرحتك..أااا.. قصدي دمعتك وهي عيانة
شايفاك وأنت بتشاور لمامتك علشان ما تاكلش من البيتزا اللي هي عاملاها
شايفاك وأنت داخل بجزمتك في الشتا بعد ما مسحت الأرض
شايفاك وأنت بتهرب منها وهي بتغسل المواعين
(مش عاوز تساعدك ليه)

شايفاك وأنت عامل نفسك نايم علشان ما تشيلش ابنكم اللي طول
الليل يعيط

■ ■ ممنوع الضحك ■ ■

شايفاك وأنت بتتاوب وعرفت إنك شايل اللوز
(مش لازم توريها ضرس العقل المسوس على فكرة)
شايفاك وإنك بتضحك
شايفاك لما تحبها
خد بالك بتراقبك هي والعيال



■ ■ ممنوع الضحك ■ ■

10

شايك

هو شايك وأنت بتبرقي لابنك علشان كب العصير على السرير.
وشايك وأنت بتكزي على سنانك لما ابنك كتب في الواجب حرف
السين معوج ونازل من على السطر
(يا شريفة).

وشايك وأنت بتخطفي الأكل من العيال
(قلنا هاتي لك كيس شيبسي معاهم وكل واحد ياخذ نصيبه)
وشايك وأنت بتكلمي مامتك في التلفون وعوجتي بقك وإنت
بتحكي لها على زيزي بنت عمك
(يا تحفة)

■ ■ ممنوع الضحك ■ ■

وشايفك وأنت بتاكلتي سندوتش الطعمية

(آخر واحد في الأربعة)

وشايفك وأنت بتتاوبي وفاتحة بقك زي سيد قشطة

(يا ستير يارب)

وشايفك وإنت بتدوري على القملة..ق.. قصدي على التوكة اللي

في شعرك

وشايفك وأنت رابطه راسك وأنت بتنضفي الشقة

(وبيحاولك ينسى)

وشايفك وأنت بتنطقي الإنجليزي غلط وأنت بتكلمي رانيا

وشايفك وأنت ماسكة الشبشب وبتذاكري للعيال

وشايفك وأنت بتحلقي في الأرض وتدوري على دبوس الطرحة

اللي وقع منك

(قلنا خدي بالك واسبكيه في حاجه تتساف)

وشايفك وإنت بتشدي بنتك من شعرها علشان خدت الريموت

■ ■ ممنوع الضحك ■ ■

وقلبت القناة وجابت المسلسل اللي انت مش عاوزاه يشوفه علشان
البطلة حلوة

وشايفك وانت صاحيه من النوم

(قمر أربعنا اشر)

وأول ما النور بيتقطع بيفرح ويقول هيبويه يا رب يفضل مقطوع..

وأول ما يبجي هو اللي بيصرخ

وشايفك وإنك ماسكه الكتاب وقاعدة دلوقتي زي الأروبة

(اتعدلي وابتسمي وحطي رجل على رجل)

على فكرة بيراقبك

آه والله

وربنا ما يحرمكوش من بعض.



11

جبر الخواطر

في حابه اسمها كده.. جبر الخواطر
يعني لما تلاقي جوزك جايب لك هدية بسيطة على قد فلوسه
تفرحيه وتبينني إنها عاجباكي..
(اصبري ولما يكون معاه...ها يجيب لك كثير)
يعني تعمل لها مفاجأة وتتجوز عليها
(...أأ.. قصدي تجيب لها هدية)
يعني لما تلاقي مراتك عامله كيكة وحرقتها تعمل نفسك مش واخذ بالك
وتأكلها وإنتم مبتسم وتقول تسلم إيدك يا حياتي
(ابلع بشاي بلبن ببساعد)
يعني لما تلاقيها ضاربة شعرها في الخلاط وحاطه كاري علشان

■ ■ ممنوع الضحك ■ ■

يصفر واشترت توكة وستان جديد تفرحها وتقول لها إيه ده هو القمر
جه عندنا يا ولاد

(حاول ما تضحكش.. ممكن تبص للنجفة وأنت بتقول كده)

يعني لما تطخن بعد الولادة ما تقولهاش في وشها وتجرح شعورها
انت لازم تخسي يا كلبوزة

(اتصال من مجهول إنك بتدور على عروسة حاخسسها النص)

يعني لما يزعلك ويعمل نفسه عيان تسامحيه وتعملي نفسك
قلقانة وتعديها وتفتكري له الخير وتجري تعملي له كمادات
(بلاش الحقن)

يعني لو حابة تتكلم اسمع لها.

(اسألها وزنها كام وهي هاتتكم وتبطل وتقوم تعمل لك شاي)

يعني لو هايغير القناة علشان الماتش تقعدى ساكنة وتشاركه اهتماماته.

(ممكن تدعي على الفريق اللي بيشجعه في شرك وخدي راحتك)

يعني لو طلب أكلة تطبخيها فوراً.. علشان هو حبيبك.

■ ■ ممنوع الضحك ■ ■

(زودي السمنة خليه يطخن علشان البنات ما تعاكسوش)
يعني تفكريه بأول مرة شفتيه لما جه يطلب إيدك.
(انسي القميص الأخضر والبنطلون البني هو مش ها يعمل كده تاني)
يعني تفكرها بيوم ما خرجتوا أول مرة بعد كتب الكتاب
(معلش انسى اللي حصل في المطعم كانت جعانة ما تحكيش
الجزء ده)

يعني لما تنادي عليها تدلحها باسم جميل
(لو فتحية قولها لها يا فيفي..عنايات يا توتو..انشرح يا شوشو..
أشجان يا جيبي.. وكده)
يعني تقولي للولاد بصوت يسمعه لما يرجع من الشغل ويفتح
الباب بابا حبيينا القمر جه
(هو كويس ما تقلقيش حا يضحك بعد شوية هو بس خد باله من شعرك)
جبر الخواطر سهل... بس إحنا بننسى.



■ ■ ممنوع الضحك ■ ■

12

تعرفي إزاي إن جوزك بيحبك

♥ (دأيمًا بيتسابق معاك عاوزه يفرمك)

ولما تلاقيه وانتوا راجعين من كارفور وشايلين الأكياس بيضربك مقص برجله ويطلع يجري على السلم..

♥ (بيحبك وعاوزه تدخل في الجنة)

مش إنتِ تصحي على صوته وهو بيلطش لك بالأفلام ويقول لك..
قومي صلي قيام الليل.

♥ لما تطلبيني حاجة مش بينساها

(معلش هو البيروسول طلع معاه صدفة وهو بيدور على مزيل

العرق)

■ ■ ممنوع الضحك ■ ■

لما يقول لك تستنيه كل يوم ورا الباب علشان يبقى وشك أوّل
حاجة يشوفها لما يدخل.

(ويرزحك في صباع رجلك الصغير غضب عنه.. غضب عنه ما انت
كمان فرمتي رجله غضب عنك)

لما يصحى قبلك ويمشي على طراطيف صوابعه علشان ما
يزعجكيش

♥ (مسن بيهررب إطلالًا)

لما ينام بعدك ويظمن عليك ويغطيك بنفسه

♥ (أخيرًا نامت... أحمدهُ يا رب)

لما تلاقيه فجأة وانتوا بتأكلوا خطف من إيدك ورك الفرخة ونزل
فيه أكل

♥ (هو بس مبي يأكل من الحمة اللي إنت أكلتي منها

بشفايفك... رومانسية وكده)

لما تلاقيه هبش من إيدك كباية العصير

■ ■ ممنوع الضحك ■ ■

♥ (عاوز برضه يشرب من الحمة اللي إنت شربتي منها
أصله بيحبك)

بيجيب لك طلبات البيت

♥ (ماعد ابرطمان التوتيللا اللي طلبتيه)

لما تخرجوا بيثيل الولد على قلبه

♥ (شيلي إنت الأكياس يا حلو...الولاد بتهدك الطرعر
والهدوم وحافظي على سياكتك)

بيأكلك بإيده

وبيزق دماغك في ركن المطبخ ويحط اللقمة في بؤك

♥ (إوعي تفكرني إنت ده علشان تبطلني رغي لا سمع الله)

بيشكر فيك قدام أهله

علشان بيحبك والله مش علشان ما يشمتوش فيه)

بيجيب لك هدايا

■ ■ ممنوع الضحك ■ ■

♥ (نزي السوار اللبي بيكرت.. فاكر اه)

بيفليكي..أأ... قصدي ييسرح لك شعرك ويعمل لك ضفاير

♥ (رومانسي)

بيفسحك ويوديكي البحر

♥ (مش ذنبه... انت اللبي اتلعلتي نبي العباية وكنتي ها تفرقي)

بيكتب فيك شعر

♥ (العلزونة يا أما العلزونة)

أهو ده الحب

شفتي بقى

وربنا يحبه فيك كمان وكمان... اللهم لا حسد.



حاجات ما تنسيش

كل واحد فينا عنده ذكريات حلوة.. وحاجات جميلة ما تنسيش..
صاحبك الطيب اللي كان قاعد جنبك في ابتدائي.
كراسة الرسم والألوان الشمع.
جزمة المدرسة الجديدة اللي بتوجع وتعمل بقبيقة في رجلك.
يوم تجليد الكتب والكراسات.
ريحة الأقلام الرصاص الجديدة.
البراية والأستيكة أم ريحة حلوة.
كيس الساندويتشات وجرس الفسحة.
كباية المية اللي بتتفتح وتتقفل ولها غطا.
حصة الألعاب والفرحة بالصفارة.

■ ■ ممنوع الضحك ■ ■

رحلة الأهرامات وصورتك عند أبو الهول مع صحابك.
شف الخرايط وتلزيقها في الكراسات.
ريحة كحك العيد وقعدتك جنب مامتك وهي بتعمل البسكوت
ولما تديك عجينة وتبوظها وتخبزها لك وتآكلها وأنت فرحان.
فانوس رمضان اللي فرحت بيه وطفيت النور علشان تتفرج عليه
مع إخواتك.

شكل فلوس العيدية وأنت بتعدها.
مراجيح العيد وألوانها.
آخر لحظات قبل الفطار في رمضان وأنت بتحلّم بالمية والعصير.
فوازير رمضان وأنت صغير وأنت بتفكر في حلها وتكتبها.
لمة العيلة والسهر وصوت ضحكتهم ورننتها وحكاوي زمان وذكرياتهم
وأنت بتنعس وتنام على رجل مامتك.
اللعب مع ولاد عمك والعراك معاهم وضربهم والغيرة الشقية.
خروف العيد وصوته وهو ييمأماً

■ ■ ممنوع الضحك ■ ■

السفر في العربية أو القطر وأنت فاكر إن القمر ماشي معاك وبتعد
الشجر على الطريق والهوا بيخبط في وشك.
المصيف والبحر والشمسية والطيارات الورق والفريسكا والجردل
والجاروف وبيوت الرمل.
الذرة المشوي وأنت واقف مستني تشتري وماسك الفلوس في
إيدك وصوت فرقعته في النار والبياع بيهوي على النار بكرتونة.
حضن تيتة وضحكة جدو.
مفاجأة خالتو وهديتها.
طعم الآيس كريم ولوليتا بالفراولة.
كارت عيد الأم اللي كتبتة لمامتك وباستك بوسة كبيرة وحضنتك
وفرحت بيه.
صوت مفتاح الشقة لما باباك يرجع وتجري أنت واخواتك على
كيس الفاكهة اللي معاه علشان تشوفوا فيه إيه.
النور لما يقطع واللعب بالأيدي قدام نور الشمعة والضحك على

■ ■ ممنوع الضحك ■ ■

شكل الخيال على الحيط

الفرحة وصرخة هيبه لما النور يبجي تاني.

وحشتني نفسي وأنا صغيرة.



حصاد الغربة

حقيبة السفر، وصوت الطائرة، ودموع أمك، ودموعك، إنها بداية الرحلة. تلك اللحظات عندما تغادر أرض الوطن ويرحل فيك الوطن! فتحمله هنا في صدرك وتشعر لأول مرة أنه يوجعك. أجبرك على الرحيل بغلق الأبواب.. تقلص فيه كل شيء حتى الرغيف وغاب الأمن والأمان.. الآن ترحل، تاركا خلفك، فصول الربيع الحلوة، ونسمات الشتاء الباردة، وبعض الذكريات. ستجد نفسك في أرض أخرى كنبته خضراء اقتعلت بجذورها من أحب بقاع الأرض إليها، فتمزقت الأطراف ونقلت لتربة أخرى وسقيت بماء آخر طعمه يختلف عن ماء نيلنا الحبيب، ذاك الذي لوثته بقاياها لكننا نحبه، وسنظل نعشق طعم مائه العذب.. ستعيش... لكنك ستشعر بوحدة.. العيد سيكون صوته بارداً على الهاتف. رمضان لن ترى زينته في الشوارع، ولن تقف مبتسما وأنت تراقب تعليق الفوانيس. ستغيب رائحة الفول والسهر للسحور. حزن أمك سيكون على شاشة الحاسوب لكنك ستشعر بدفء دموعها لأنك ستبكي.. ربما ستفاجأ بخطبة أختك، أو

■ ■ ممنوع الضحك ■ ■

بزفاف صديقك، وسيرسلون لك صورة وتعليق. ستضحك أحيانا... لكنك ستدخر الفرحة حتى تعود وكأنك لا تراها ملائمة لغربتك. وإن عدت سيبتعدون قليلا لأنهم يظنون أن كل أيامك كانت ضحك وفرح ومرح ونقود، وربما يبخلون عليك بالابتسامة. سيراقبون هاتفك الجديد وساعة يدك وحروف الماركات الشهيرة المخطوطة على سترتك.. ستشتري كثيرا وكأنك تبحث عن شيء يفرحك.. وتدخر مالا ستتعب فيه بشدة وستدفع ثمنه من عمرك وسيفوتك الكثير.. وسيتوقعون أضعاف أضعافه فأنت (سافرت بلاد بره ومعاك فلوس). سيشككون في وطنيتك.. ولو ناقشتهم سيسكتونك لأنك بعيد ولا تشعر بمعاناتهم. رأيك الذي كان هاما ويؤخذ به سيكون أحيانا رأي فقط يسمع ورغم صحته لن ينفذ لأنهم سمعوه بعد فوات الأوان. أقرب الأصدقاء سينشغلون عنك، ستبدأ برسائل ومكالمات عميقة وحارة، وستعتاد ويعتادون على غربتك وستبقى علاقات الحب العميقة أغلبها ذكريات حلوة. سترتبط بوطنك الجديد، لكنه سيعاملك معاملة الطفل اللقيط فأنت لا تشبه أبناءه لكنه سيرحب بك ما دمت تنتج وتعمل.. واحذر فر بما يلفظك في لحظة على قارعة الطريق، فأنت غريب. ربما ستمل أحيانا من إجازاتك لأن الجميع سيدخر كل المشكلات طوال العام ليقصها عليك بتفاصيلها

■ ■ ممنوع الضحك ■ ■

وسينسون أنك جئت لترتاح. مطلوب منك مجاملة الجميع خلال زيارتك القصيرة حتى لو مر علي المناسبة شهور طويلة ولن يشعر أحد بمرضك وأنت وحدك في غربتك. غربة مرة.. لا تحليها إلا تلك الوجوه الباسمة التي ستلتقيها في المساجد فتعرف فلانا وقد أوجعه وطنه أيضا في صدره فتبدأ صداقات جديدة وحب في الله من نوع آخر لم يركض من قبل على أرض المدارس ولا ساحات رياض الطفولة. عندما تمرض هم سيزورونك، ستطبخون معا وتخرجون معا وتضحكون معا وكل منكم يحمل قصة من ماضيه ربما يسامركم بها في ليلة.

ستلدين في غربتك وربما تلتفتين فلا تجدين أمك لكنك ستأكلين من يد صديقتك السورية والأخرى المصرية وتلك الفلسطينية فكلكن غريات. ستكونون أسرة كبيرة، وستجتمعون في رمضان والعيد سيكون بطعم مختلف. ستربتون على أكتاف بعضكم وتطيب بعض الجروح. ستتحرر الآن من قيدك... ستضحك من قلبك وستفرح هنا حيث أنت.. ستحب حياتك وتعود كل عام وأنت أقوى ولن تؤلمك ردود أفعالهم لأنك ستفهمهم... فالوطن في الحقيقة ليس في الأرض ولا في الحدود ولا في العلم، فكلها رموز... الوطن فيك أنت.. (أنت الوطن).. اللهم رد كل مغترب لوطنه، واجعله وطنا آمنا مطمئنا، واحفظ أحبابنا في كل بقاع الأرض.

■ ■ ممنوع الضحك ■ ■

15

الليلة الأخيرة

أوقف سيارته أمام باب البناية التي يقطنها مع أسرته الصغيرة، هرول
على الدرج مشتاقاً لابنتيه الحبيبتين،
أخرج المفتاح من جيب سترته وأداره في الباب بهدوء وسار على
أطراف أصابعه،
كان يهمّ بدخول غرفته عندما تناهت إليه همهمة منخفضة قادمة
من غرفة البنات،
كتم أنفاسه ووقف ينصت لزوجته التي كانت تتحدث إلى شقيقتها
على هاتفها النقال
بعد أن نامت ابنتها.. حيث هتفت غاضبة:

■ ■ ممنوع الضحك ■ ■

- ها أربيه، والله لأربيه
شعر برجفة تجتاح جسده وازدرد ريقه بصعوبة فأردفت وهي تتوعد:
- مش ها أخليه يأخذ نفس حتى في البيت
ضاقت أنفاسه وشعر بألم شديد في صدره فأكملت:
- أكل إيه اللي ها اعملهوله... وأتعب نفسي ليه!!.. يارب يموت مسموم.
وضع يده على معدته وشعر بتقلص شديد فأردفت بصوت حاد:
- لا مش أول مرة دي اتكررت كثير قدام عيني
وضع يده بهدوء في جيب بنطاله وأخرج الهاتف وقام بإلغاء
المحادثة التي كانت بينه وبين "ريري" تلك الفتاة الخليعة التي تثرثر
معه على صفحة الفيسبوك بكل ما فيها من عبارات غزل وحب وغرام
وسمع زوجته تقول:
- إيه.. أصبر.. أصبر ليه والدنيا تخرب وبيتي يتبهدل..لالال..أنا
صبرت خلاص وقلت هايسيينا لوحدته وسهلت له كل الطرق

■ ■ ممنوع الضحك ■ ■

حدّق في الظلام وصارت دقّات قلبه كطبول الحرب وعاد لهاتفه وقام
بالغاء الصداقة التي بينه وبين تلك الفتاة، بينما عادت زوجته تهتف:
- ها أضلمها له ومش ها أخلي أي حاجة في البيت... ها أموته من الجوع
ابتلع ريقه بصعوبة وهي تكمل:
- لأ.. وليه أستنى... ما أنا أقدر عليه لوحدي ولا يهمني
بدأ يرتجف وقرر أن يسير ببطء نحو باب البيت ليهرب منها بينما
كانت تقول برتابة:
- خلاص، ها أسيبك بقى لأحسن الوقت مر ولازم أقوم
سار خطوتين فقالت:
- طبعا مش ها أحسس البنات، أنا نيمتهم بدري النهاردة لأنني
خلاص نويت له على نية سودة
أسرع مهرولا برعب نحو الباب وقد ارتفع صوتها قائلة:
- الليلة... لازم تكون آخر ليلة في حياته

■ ■ ممنوع الضحك ■ ■

كاد أن يدير مقبض الباب لولا أنها إقتربت وهي تضع الهاتف على
أذنها فرأته وقالت بعد أنهت سريعا المكالمة مع شقيقتها وابتسمت:

- حبيبي، إتأخرت ليه؟

في فار دخل المطبخ تاني...عاوزاك تساعدني علشان نقتله سوا يا حبيبي
قال بحماس وصوته يرتعش:

- والله لأدبحه وأكسر دماغه...هو فين؟

قالت بمرح:

- اقفل الموبايل الأول وركز معايا وما تقعدش تقلب فيه زي كل يوم

قال بثقة:

- لا ما أنا خلاص... حرمت يا حياتي.



الشيخة فيفي

ذات صباح في بيت هاديء دار الحوار التالي:

- حبيبتى صباح الخير

- استغفر الله العظيم أنت ما تعرفش إن صباح الخير بدعة.. الشيخ

عبد الهادي اتكلم عنها في كتاب

الكلام الأخير في حكم صباح الخير

- طب خلاص السلام عليكم.

- قولها كاملة علشان الثواب وعليكم السلام ورحمة الله وبركاته زي

نصيحة الشيخ عبد السلام في كتاب

آراء الإمام في كيفية إلقاء السلام.

■ ■ ممنوع الضحك ■ ■

- ودول بتسمعيهم في الراديو يا فتحة.
- قول لي يا فيفي
- هي فيفي دي مش بدعة؟
- طب ما تقولهاش قدام إخوانك
- دول الشيوخ اللي ببيجوا في التلفزيون.
- صحيح، كويتي لي القميص والبنطلون.
- معلش نسيت أصلي كنت بصلي قيام ليل وسهرت لحد الفجر.
- ما شاء الله طيب النهارده الخميس مش هنروح لأمي ده أنت ما شفتيهاش من شهر.
- لأ روح أنت وخذ الولاد أنا رايحة درس الشيخ همام
- في كيفية صلة الأرحام
- خلاص لما ترجعي اعلمي لنا بسبوسة بالأناس والكريم شانتيه
- لاحسن أكلتها عند واحد صاحبي ونفسي فيها.

■ ■ ممنوع الضحك ■ ■

- استغفر الله أنت ما تعرفش إن الكريم شانتيه فيه شبهة في مكوناته إنها تحتوي على ودان الخنزير.
- أعوذ بالله.. بلاش.. طب وبالنسبه للبسيوسه.
- من اسمها أهه (باس.. بوسه) أنت ترضى إني أعملها.
- لأ طبعا.. أقنعتيني الصراحة.. طيب هنفطر واللا بدعة.
- هنفطر طبعا تحب تفطر إيه.
- والله أنا جعان جوع السنين اعلمي أي حاجة مش بدعة ولا حرام وأنا هاأكلها.

- طب ها أصلي الضحى الأول وارجع لك.
- ما تتأخريش.



بعد ساعة..

تيكيلام تيررين تكيكيلام

■ ■ ممنوع الضحك ■ ■

- (صوت المعلقة وهو يقلب الشاي وهي داخلة بطرحة الصلاة).
- إيه يا حبيبي أنت عملت شاي.
- وفطرت كمان يا ست فيفي.
- أنا يا دوب قرئت الورد بتاعي. وكنت جاية خلاص أعمل لك الفطار.
- ولا يهمك.. بأقول لك إيه.
- نعم يا حبيبي.
- هو الشيخ همام قال إيه عن تعدد الزوجات؟
- هتروح لمامتك الساعة كام يا حنفي.



حوار دسم جدًّا (أفكار، ملاحظة)

دقَّت الساعة معلنة بحذر أنها الثالثة عصرًا،
حلَّق أفراد أسرة الأستاذ (حنفي) مدير عام مصنع الأناقة للغزل
والنسيج حول مائدة عامرة بما لَدَّ وطاب.
اقتربت زوجته المصون وهي تسير بخطواتها البطيئة وبين يديها
طبق كبير تكدس عليه ما لَدَّ وطاب من المحمر والمشمر.
مالت الأم وشغلت حيزًا كبيرًا من الفراغ، فمال أبناؤها يمينًا ويسارًا
ليفسحوا لها الطريق لكي تضعه في وسط المائدة وجلست مُحدثة رجَّة
هائلة فاهتز المرقق واندلق بحياءٍ من السلاطين المتأرجحة بدلال.
ودار حوار دسم جدًّا:
- بسم الله الرحمن الرحيم.. بسم الله يا أبو محمد.

■ ■ ممنوع الضحك ■ ■

- الله! ريحة برام الرز هاييلة يا ماما
- بالهنا والشفاء يا حبييتي.. ما تتقليش علشان العريس اللي جاي بالليل
- أجابت (نوسة) وهي غاضبة بعد أن أمطرت المائدة بحبات الأرز وهي تمضغ قطعة اللحم التي ألقّت القبض عليها مدسوسة في البرام المعمر:
 - ليه هو أنا داخلة امتحان.. اللي مش عاجبه ما يبصش.
 - ورفعت حاجبها الأيسر ثم أردفت قائلة:
 - أنا كده زي القمر.
- أشار الأستاذ حنفي إلى ابنته بربع الرغيف المتبقي في يده بعد أن قضى على بقيته وهو ينقنق غارقاً في طبق الباذنجان المخلل الذي تمددت أصابعه في خنوع وهي مستسلمة لنظرات حنفي المفترسة وقال:
- بيقولوا عنده شقة يا نوسة، بس مش هايقدر يدفع مهر كبير
- يا دوب الشبكة، بس والله شاب محترم ويعرف ربنا، وكمان شافك
- يا نوسة أكثر من مرة ومعجب بأخلاقك وحجابك.
- رفعت أم محمد رأسها فجأة ونظرت إلى الجميع نظرة خاطفة وشفطت

■ ■ ممنوع الضحك ■ ■

الشوربة من الملعقة شفطة لولبية محدثة صوتاً بديعاً رناناً وقالت:
- كان نفسي يندفع لها مهر زي نوال بنت أختي، أمال إيه.. هو أنا
بنتي شوية؟

ابتسمت نوسة بعد معركة جانبية مع ورك الفرخة المأسوف على
شبابها وقالت وهي ترفع يدها ممسكة ببقايا الدبوس قائلة:
- أنا نفسي في فرح كل الناس تتكلم عليه، وعاوزاه في فندق
كبير، وعاوزه العريس شعره ناعم وبيفرقه من النص ويوم الخطوبة
يلبس كرافطة برتقاني لون فستاني اللي هايكون بديل.

ابتسم شقيقها محمد ابتسامة جانبية وقال بصوت خافت:
- ديل!!.. هو أنت ناقصة؟

قامت نوسة بتوجيه ضربة حرّة مباشرة لصدر محمد، فاهتزت
المائدة، وتبادلت أصابع الكفتة نظرات الاستغاثة مع ورك
الفرخة واستمر الحوار..

لوح حمدي بالخيار التي استشهد نصفها على شفثيه وقال:
- أنا باقول ما فيش لازمة للأوتيل والفرح والكلام الفارغ

■ ■ ممنوع الضحك ■ ■

وكفاية يكمل شفته وأهو تلبسي فستان أختك فيفي.. طالما الولد صالح وتقي ويعرف ربنا.

ابتلعت نوسة ما في فمها ورفعت حاجبيها وقالت:

- إشمعنى أنا يا بابا؟... وبعدين أنا لازم أخس النص علشان

ألبس فستان فيفي أصلاً!

انتهز محمد الفرصة وقال:

- بس أنت خسي وأنا أركبك ديل... قصدي للفستان.

التفتت إليه موجهة ضربة ركنية لخد الأيسر فانهارت حلة المحشي

متعاطفة مع آلامه، وتبادل حنفي مع زوجته النظرات، وهنا قررت الأم

أن تتناول أطراف الرغيف..

أأ أقصد الحديث لكي تشرح لها عملياً..

فقامت بإدارة الديك الرومي ليكون أمامها مباشرة وغرست

السكين فيه وقالت وهي تعض بأسنانها العلوية على شفتها

السفلى:

■ ■ ممنوع الضحك ■ ■

- لازم نصبر عليه لحد ما يستوي، ونوطي النار.
- أضاف الأب وهو يتناول طرف الرغيف الآخر:
- وبعدين ما نكتّرش فيه الملح لأحسن يتهري ويطفش..
وأكملت زوجته:
- وبعد ما يستوي ويبقى في إيدينا ويسيب لنا نفسه
كده، نمسكه كده بالشوكة، ونقطّع فيه زي ما احنا عاوزين، وممكن
كمان نحمّره أو نشويه
- سألته نوسة بخوف بعد أن أحسّت بتأنيب الضمير
- هو مين يا ماما؟
- أجابتها ببساطة وهي تلوح بالسكين:
- الديك طبعًا يا نوسة..
- ارتبكت نوسة وتأمّلت قطعة الديك الرومي التي رفعتها أمها على
طرف السكين وألقتها في طبقها المستدير.. ونظرت إليها بحول شديد..
وتذكرت كيف يعود أبوها من عمله وعلامات الإجهاد على وجهه.

■ ■ ممنوع الضحك ■ ■

ثمّ التفتت إلى أخيها محمد وتذكرت كيف ينام على الأريكة وهو يشاهد التلفاز لمدة ربع ساعة ليتستيقظ على صوت الملعقة وهي تصطدم بكوب الشاي وأمه تقلّب السكر.. ليتجرعها بسرعة وهي ساخنة، ليهزول إلى عمله الآخر الذي لجأ إليه ليحاول إكمال ثمن مقدم شقة بسيطة مكونة من غرفتين وصالة ليخطب فتاة أحلامه فأزاحت الطبق وقامت وهي تمسح آثار الجريمة من على فمها وقالت:

- ماما.. أنا خلاص هابتدي ريجيم من بكره

بابا.. أنا موافقة على كل حاجة وكمان هالبس فستان فيفي.. بس يارب أعرف أخس.

محمد يا أخويا، ألبس إيه النهاردة؟

رفع محمد رأسه ونظر إليها بحنان وقال:

- أي حاجة من غير ديل ومش برتقاني ها تبقى حلوة..

وعلى فكرة أنت مش طخينة قوي ده أنت زي العسل.



■ ■ ممنوع الضحك ■ ■

18

عريس بوسي

- يا بوسي يا بسبوسة

- أيوه يا ماما

طنط تهاني الخاطبة جت ومعاها صور شوية عرسان وأنت تتفرجي

وتنقي وتختاري.

- إزيك يا تونت

- أهلاً يا بوسي والله تونت طالعة من بقبك زي العسل.. خدي

شوفي كده على طول إيه رأيك في العريس ده.. مهندس بترول وعنده

28 سنة واسمه تامر.

- لأ. ده حواجه بتسلم على بعض.. مش عاجبني

■ ■ ممنوع الضحك ■ ■

- طب مايسلموا براحتهم.. مش اخوات..
- طب بلاش خدي ده دكتور أسنان وعنده ستة وعشرين سنة واسمه وسيم.
- لأ ده رموشه قصيرة وعنده ودن أكبر نص مللي من الثانية.. مش عاجبني
- طيب شوفي شوفي.. ده بقى مش هاتتكلمي ولا تنطقي.. رامي..
- مدرس ألعاب.. شعره سايح أهه والأوصة على جنب أهه سايحة
على عنيه
- وممكن أكلمهولك يفرق لك شعره من النص يوم الخطوبة.
- لأ شكله بلدي وفلاح
- فلاح!
- طيب استني شكلك عاوزه عريس كده أستاذ ومهندس.. ما فيش غيره
- هاتي يا تونت وأنا أنقي لوحدي.
- خدي يا ضنايا الصور كلها.
- ده كويس أبو عين خضرة ده صحيح شعره مفلفل شوية بس مش
مشكلة.. اسمه إيه.

■ ■ ممنوع الضحك ■ ■

- زين ما اخترتي يا بوسي.. اسمه جعلص أبو المناديل ده دكتور بيطري قد الدنيا وغني ومؤدب وعيلتهم كبيرة قوي من الشرقية.
- لالالا.. مش عاوزه جعلص اسمه مش عاجبني..أنا عاوزة ده.
- وريني..آآاه.. معلش يا حبيبتى ده خطب خلاص.
- طيب حاطه صورته ليه... طيب ده اسمه إيه؟
- بس ده الأستاذ حنفي.. طلباته مختلفة شوية يا بسبوسة بلاش منه.
- ليه يعني يا تونت؟ ده حتى عادي جدًّا وخدوده كبيرة.
- عاوز واحدة شعرها أصفر وعنيها خضرة وصارخة الجمال ومتفجرة الأنوثة... مممم.. وأنت جمالك هادي ياختي ومش بيصرخ.
- طيب خلاص هاوافق تامر اللي حواجه إخوات يبجي وأمري لله هااستحمل منظره.
- طيب هاتي بقى بياناتك بالكامل استني لما أطلع النوتة.
- اكتبني يا تونت..أنا الحمد لله وما شاء الله عليه ربنا يحرسني معايا ليسانس وباحضر الماستر

■ ■ ممنوع الضحك ■ ■

- يا ساتر يا رب بتحضري!!! ليه يا بنتي..اللهم اجعل كلامنا خفيف عليهم.
- وباحب القراءة والرسم على الزجاج.
- حلو وأهو تلوني الكاسات والكبايات.
- وعندي مدونة على الإنترنت
- باكتب خواطري.. وأكاونت على الفيسبوك.
- وماله يا حبييتي هاتي كل اللي نفسك فيه.. طيب بتعرفي تطبخي؟
- طبعاً ومتابعة الشيف شربيني
- ولك في شغل البيت يا بسبوسة؟
- ممم.. بدأت يا تونت وعملت إمبراح لماما سندويتش جبنة بطماطم.
- طماطم..!!
- طب طلباتكم كده في الشبكة والمهر والحاجات دي إيه علشان لو
- الباشمهندس تامر سأل.
- أنا متواضعة جداً
- وإحنا هانسهل عليه كل حاجة.. شوفي يا تنتوتة

■ ■ ممنوع الضحك ■ ■

- عاوزه شبكة ألمان زي ريهام،
ومهري مايقاش أقل من سوزان،
والخطوبة تكون في فندق كبير زي هوايدا،
والفرح كمان زي إلهام،
وشهر العسل في تركيا زي علا،
وعاوزه عنده عربية زي خطيب إبتسام.
- مين كل دول يا بوسي؟
 - بنات عمي وخالي.
 - الا صحيح أنت اسمك الحقيقي إيه يا بوسي؟
 - لازم يعني يا طنط
 - أيون يا حبيبة تونت
 - باتعة مصباح الشحات أبو نجمة.
 - ومش عاجبك جعلص....عجبي!



19

سامح

سامح شاب طيب ويبدور على عروسة.. في يوم مامته ندهت عليه:

- سامح سامح.

- أيوه يا ماما.

- طنط تهاني الخاطبة جت تعالى قول لها على مواصفات العروسة

اللي نفسك فيها.

- إزيك يا طنط.

- بسم الله ما شاء الله إزيك يا سامح والله كبرت وعاوز عروسة.

- يا رب بقى ألقى عروستي عندك.. لاحسن أنا دخت وتعبت من

كثر العرايس اللي شفتهم.

■ ■ ممنوع الضحك ■ ■

- يارب.. ها قول يا حبيبي علشان أكتب.. استنى لما أطلع القلم والنوثة.
- عاوز واحدة متفجرة الأنوثة.
- ليه بس يا بني ربنا يكفيننا شر الانفجارات.
- وعاوزها قنبلة كده لما تظهر في أي مكان.
- ليه بس ما تعقل يا بني واللا إيه.. ماشي هاكتب
- أهه.. أون.. ب... له.
- وعاوزها شعرها حرير ويهفهف كده على خدودها زي الشرارة
- اللي بتطلع لما الواد سيكو الميكانيكي بيشغل مكنة اللحم.
- سهلة دي الكرياتين حلها يا سامح.. اللي بعده.
- تكون عينيها خضرة وواسعة ومدورة.
- هتحسدك يا بني بلاش مدورة دي.. هاكتب عينيها حلوة وخلص.
- طيب.. بس اكتبني كمان إنها تكون مش قصيرة علشان تعرف
- تنضف النجف وفوق الدولار وكده.

■ ■ ممنوع الضحك ■ ■

- حاضر.. طويي.. يل.. ة.. زي راس.. ال.. عبد.
- وبها صغير وبتعرف تحط روج.
- ما كلهم بيعرفوا هياكلوه يعني.. بقها ص.. غ.. ي.. ر.
- ومناخيرها رفيعة وتكون شايلة اللوز واللحمية..
- لالالا.. لازم تتنازل شوية يا بني الطلب ده كتير.
- خلاص مش مهم.. أمري لله.
- وإيه كمان.
- وعاوزها رقيقة وبتعرف تتكلم كده ومدردحة وفاهمه كل حاجة مش قفل.
- وماله.. مد.. ر.. دحة.
- بس محترمة وبريئة وما بتطلعش منها العيبة وخام.
- مدردحة وخام يا سامح!
- آه.

■ ■ ممنوع الضحك ■ ■

- وفاهمه كل حاجة وبريئة يا بني!
- أيوه.
- ومتفجرة الأنوثة وبتفرقع يا حبيبي!
- أيوه يا طنط هو أنا ها اتجوز كام مرة يعني.
- كمل يا سامح.
- عاوز أحس إنني ها اتجوز ملكة جمال يعني ما احتاجش أبص لأي بنت بعدها.. عاوزها قمر قمر قمر.. مالك يا طنط بتبصي لوداني ومناخيري ليه؟
- أبدا يا حبيبي بتأمل فيك وفي جمالك ووسامتك.. خلصت؟
- كفاية كده أنا فنوع وهي دي بس طلباتي.
- طيب تعليمها، ثقافتها، دماغها، إخوانها، مش عاوز حاجة متفجرة كده واللا حاجة.
- لا مش مهم.. شكلها أهم حاجة.

■ ■ ممنوع الضحك ■ ■

20

الملافة سعد

في ناس لما تفضض معاهم يعملوا كده.. وخليني أوصف لكم
أربع مواقف:

♠ (في أيام الامتحانات)

- الإمتحان قرب ونفسي أذاكر
- مش ها تلحق ما فيش وقت
- أهو هحاول ألقط يمكن ربنا يكرمني
- ماينفعش أصلاً كان لازم تذاكر من أول السنة.
- أنا حليت وحش في الامتحان
- شفت مش قلتك طول عمرك فاشل

■ ■ ممنوع الضحك ■ ■

- أنا قلبي مقبوض

- يبقى هاتسقط.

- أنا خايف

- لازم طبعا تخاف مافيش أمل.

* * *

♥ "فبي الخلافات الزوجية"

- مراتي مدوخاني وكل شوية تغضب وتروح عند أهلها

- أنا لو منك أطلقها

- طب ليه بس أنا بحبها

- اتجوز عليها زيزي وأدبها.

- لالا...هي بس ساعات بتتغندر عليه.

- ولع لها في العباية البرتقاني.. واحرق قلبها على الطرح الفوسفوري.

- هي طيبة مش عاوز أجرحها بس المشكلة مامتها

■ ■ ممنوع الضحك ■ ■

- بص أول ما حماتك عينها تروح في النوم بلغ عنها وقول إنها إرهابية.

- هي عارفة إن روعي في العيال وبستغل كده

- اقتلهم واقهرها عليهم.

- مش قادر أعيش من غيرهم

- انتحر علشان تحسسها بالذنب.

* * *

♠ (في المرض)

- أنا رحت للدكتور

وحا أعمل عملية علشان لقي عندي (.....)

- ربنا يستر.

- مالك بتقولها كده؟

- لا مافيش بس.. ربنا يستر

■ ■ ممنوع الضحك ■ ■

طب قول لي هو إيه ال (.....) ده اللي ها يشيلهولي من بطني.

- بلاش تعرف أحسن.. وربنا يستر

- طب يعني ها أموت واللا إيه؟

- كلنا حانموت وربنا يستر.

- طب أنا خايف ومرعوب وركبي بتخبط على الجيران.

- بلاش تخبط عليهم بالليل وربنا يستر.

* * *

♥ (عند شكوى الزوجة من زوجها)

- حاسة إن جوزي متغير من نحيتي

- يبقى إتجوز عليكِ فيفي الرقاصة.

- بعد الشر..أنا اللي حاسة إني مش زي زمان

- أصلك لظلظتي وبقيتي شبه فوزي.

- عندك حق أنا فعلا بقيت غريبة.

■ ■ ممنوع الضحك ■ ■

- وبقيتي كئيبة كمان وودانك قشفت ورموشك وقعت وعمودك الفقري بيرقص ماكارينا.
- بس دمي خفيف صح؟
- مش واخدة بالي قوي.
- طب إيه رأيك ممكن أقص شعري زي ميسي مثلا أو أضربة في الخلاط زي شيكابالا
- الخلاط اتحرق.

♥ طب هاعمل ريجيم زي بتوع الرابع الأكبر

- ولا رابع ولا فالج طول عمرك طخينة يا أمينة.
- طب هاشتري لبس جديد.
- مش لما تخسي الأول!
- طب هاحاول أجدد حياتي وألبس له جيبة بكرانيش
- وتجديها ليه مش لما تعرفي الأول هو اتجوز عليك واللا لأ.

■ ■ ممنوع الضحك ■ ■

- طب هو برده طيب وابن حلال
- متهيألك ده بياكل الفول بالمعلقة.
- ده احنا لنا ذكريات حلوة مع بعض
- بأمارة ما زعلك من سبع سنين كده وقال لك يا فاشلة لما البامية اتحرقت.
- أنت بتفكريني ليه؟
- علشان تفوقي أنت لازم تسيبي البيت وتطلبي الطلاق ده مش حاسس بيك.

”يا طيبين الناس دي بتبقى عاوزه بس حد يسمعها

كلام ويس

وبيكملوا حياتهم ثاني وهم فرحانين، اسمعوهم وقولوا كلمة حلوة.“



■ ■ ممنوع الضحك ■ ■

21

عروسة المولد

البنات كده عرايس في مولد كبير

من أول ما تتولد

- مبروك يا أستاذ كمال اللي جاب لك يخلي لك وعقبال ما

تشوفها عروسة

- كلي يا حبيبتى علشان تكبري وتلظظي وتبقي عروسة

- حبيبة تيته تعالي هاحكي لك حدوتة

ومش بتكون حلوة وملتوتة إلا لما يتجوزوا ويعيشوا في تبات

ونبات ويخلفوا صبيان وبنات.

وتبدأ البنات تكبر وترسم

■ ■ ممنوع الضحك ■ ■

♥ (عروسة المولده)

وتشتري (عروسة) باربي وتلبسها وتقلعها وتسرح لها وتلون خدودها
بالألوان الفلوماستر
وتخلع دراعاتها وتكسر دماغها.
وبعدها تتفرج على فساتين الزفاف والدبلة والطرحه وصور
المخطوبين وتحلم
واتبرمجي يا عنايات على كده
شغلتك في الحياة تبقي عروسة
اللبس والتفكير علشان كده والحلم في حدوتة واحدة بس
واحدة بس
مافيش أي طموح ثاني!
يا بنوته
ما تخليش حلمك في الحياة عريس وبس

■ ■ ممنوع الضحك ■ ■

خليكى إنت حلم كل الناس بتتمنى إنها تحققه
انجحي واعلمي إنجازات ومفاجآت خلي الناس تعرف إنك موجودة
وخليكى شيء مميز
وقتها حتى لو العريس اتأخر مش هاتحسي بوجع ولا بفراغ
لأنك مش هاتكوني فاضية
لأن في فرحة تانية وحلم ثاني ونجاح لسه بيكمل في حنة تانية.
وقلبك عمران
مش هايدق على الفاضي.



22

وجع

كانت قاعدة جنب جوزها في البلكونة وشايله بنتها القمر اللي
شبهها، سرحت شوية واكتشفت إنه بييص لواحدة!

- عجبك؟

- ممم.. بصراحة؟

- أيوه بصراحة.

- جميلة قوي.

- نفسك فيها؟

- بصراحة.. قوي.

- إيه اللي عجبك فيها أصلاً!

- عامله كده زي القشطة.

■ ■ ممنوع الضحك ■ ■

- طيب وإيه اللي مآخرك؟
- مش جاهز ماديا.. الموضوع موضوع فلوس بس.
- يا سلام! ومالك متأثر كده.
- خايف واحد غيري يخطفها مني.
- بنتها عيطت.. قامت وطبطبت عليها ونيمتها وغطتها ورجعت له..
- ووقفت وحطت إيدها في وسطها وقالت:
- لو معاك فلوس..
- من غير ما تكلمي مش هاستنى لحظة، كفاية اللي أنا فيه.. واللي
- شفته من يوم ما اتجوزنا
- دمعت شوية وبلعت ريقها وتماسكت وبصت له بثبات، وقالت:
- ارضى باللي معاك واشكر ربنا.
- هو أنا اشتكيت ما أنا صابر أهه!!
- ربنا يرزقك الأحسن
- أصلا ما فيش أحلى منها.

■ ■ ممنوع الضحك ■ ■

- ليه يعني!
- ولا أحلى ولا أنصف ولا أروع ولا..
- كفاية.. كفاية.
- ودخلت وغابت شوية ورجعت بشبكتها وحطتها بين إيديه!!
- خد بيع شبكتي وخذ الفلوس.
- للدرجة دي!
- أيوه أنا بحبك أكثر من أي حاجة في الدنيا مش مهم الذهب ولا
الفلوس ولا أنا المهم تكون مبسوط وتحقق اللي نفسك فيه.
- تسلمي يا حبيبتي.. بس بأقول استنى شوية يمكن ألاقى عربية
تانية موديلها أشيك من دي واللا إيه.
- وماله يا حبيبي.
- طب شيلي الشبكة وهاتي شاي.
- حاضر.



■ ■ ممنوع الضحك ■ ■

23

أهلاً أهلاً بالزوار

عارفين لما جرس الباب يرن والولاد تجري وهي فرحانة وتقول
هيبويه علشان في ضيف جاي..
في ضيوف تفرح،
جميلة كده ومبهجة ومبتسمة وخفيفة وظريفة وبتيجي معاها
الفرحة وترتاح لما تشوفها وتتكلم معاها.
وفي ضيوف كئيبة،
تيجي وتمشي تزود همك وقلبك يتقبض وأول ما يمشوا تقول..
الحمد لله.

على فكرة، في حاجات ما بناخدش بالننا منها:

■ ■ ممنوع الضحك ■ ■

حاول تتصل قبل الزيارة وتستأذن علشان يستعدوا - كلنا بنحب يبقى
شكلنا حلو قدام الضيوف - وأكد عليهم لو الوقت مش مناسب يبقى بلاش.
(بدل ما تروح تخنقهم ولا أنت تنبسط ولا هم يفرحوا بيبك)
البس حلو وخلي شكلك حلو واضحك
لو في أطفال في البيت فرحيهم ولو ببونبوناية حايبوكي قوي.
(وهاتي لمامتهم شوكولاتة دي غلبانة برده)
لو رايح لزميلك ما تقفش في وش الباب علشان لو أخته الحلوة
فتحت ما تجرحش البيت.
(ولو مامته ما تدخلش رقبتك الطويلة وتقول فين محمد يا طنط
وتبخلق يمين وشمال)
بلاش تبقى زي المغص والصداع النصفي تكبس على نفس الناس وتقعده
سبع ساعات وتشتكي من كل حاجة وتكرههم في الدنيا وأنت مكشر وقرفان.
بلاش تطب على الناس فجأة وهم مش محضرين نفسهم
(الغسيل في الصالة، الراجل ضارب مراته وعينها وارمة، بنتهم جاي

■ ■ ممنوع الضحك ■ ■

لها عريس ومستشورة)

لما حد يقدم لك حاجة ما تتقرفش وتكرمش مناخيرك وكل واشرب
جبر خواطر.

(كثر خيرهم وبعدين ماله السحلب ما هو زي الفل)

ما تقعدش في كرسي كاشف البيت اختار مكان مستور علشان
البيوت عورة وأنت كمان يا حبيبي بطلي تبصي هنا وهناك
لما تروح تزور حد مريض خليك خفيف وقصر، دقائق وسيبه يرتاح
وما تاخذش معاك ابنك اللي بيحب يفتش في الادراج وبيموت في شرب
البيبيسي وتقعد تحكي له إزاي خطبت زيزي

هو بيكون تعبان ونفسه ينام وخصوصًا لو عامل عملية.

ما تروحيش لجارتك وترغي معاها الصبح وتحكي لها قصة حياتك وهي
لسه ما طبختش ولا سرحت شعرها وجوزها يدخل وهي ناسية وقاعدة
تتكلم مع حضرتك فيتخض من منظرها وتجيله جلطة سيببها تطبخ.
لو الشخصية اللي بتزورها بيتهم فيه إبتلاء بلاش نظام.. يا عيني يا

■ ■ ممنوع الضحك ■ ■

ختي يا ضنايا

الله يكون في عونك

حملك كبير معلش

(مش ناقصاك ما تزوريهاش أحسن)

لو في امتحانات عند الولاد إلغي الزيارة لأن أهمهم في الوقت ده

تجوز عليها الصدقة

ويا ريت جوزك يخرج مع جوزها اليومين دول لأنه في خطر

والجيران لبعضهم.

في ناس مش بتحب حد يدخل بيتها بالجزم وبيتأذوا جدا جدا بلاش

تضايقوهم واقلعوها لما تدخلوا جنب الباب

(وخصوصا لو الدنيا بتمطر وبتحبوا تلعبوا في المية)

لو ولادك بيلعبوا مع ولاد الناس اللي بتزورهم لازم قبل ما تمشي

تخليهم يلما اللعب ويرتبا المكان

علشان هاتدعي عليك وهي بتلمهم لعبة لعبة.

■ ■ ممنوع الضحك ■ ■

مش لازم تعلقي على كل حاجة في البيت
هي الكنبه دي مش كانت هناك، أنت نقلتي السرير هنا ليه؟
وجبتي السجادة دي إمتى وبكام؟
أنت رايحة تزوريها مش تحققي معاها.
بلاش تقوليها الكلام اللي يجرح..
مالك خاسة ووشك أصفر كده!
أنت طختني كده ليه!
مالك متبهدة كده!
ما هي كانت بتطبخ من إمبراح طبيعي تبقى فظيعة..
وإنت كمان يا فظيعة..عارفة إنك زهقتي منها لأن الزيارة طولت بس
ما فيش داعي تصرخي كتير وتلطشي في العيال وتشدي شعر بنتك وتهبشي
ابنك كل ما يعدي علشان الضيف بيتكسف ويببقى حاسس إنه السبب.
(تعبانة ما تعزميش حد)
أحلى حاجة الستات تقعد مع بعض في مكان والرجالة في مكان

■ ■ ممنوع الضحك ■ ■

تاني علشان كله ياخذ راحته ولما تضحكي مع صاحباتك زميل جوزك
وجاركم ما يسمعوش ضحكك ويتسرعوا.

لو إنتِ المعزومة كلي..

كلي حتى لو الأكل محروق

حرام عليك يا مفترية

دي طول النهار واقفة على رجليها ونكدت على جوزها علشان

العزومة وسنينها

وما تعمليش رقيقة ومش قادرة ومعدتشي مليانة

عارفينك وفأسينك.

وأخيرًا

خدوا نية لأننا بننساها

(عيادة مريض، إدخال سرور على مسلم، حب في الله)



بنت ناس

أصلها أرسقراطية ضحكتها شيك وبتحط إيديها على بقها

(مش كررر هقهقهق ولوزها بتترعش)

مش بتتكلم وهي بتأكل وبتمضغ وهي قافلة بقها

بتأكل البيتزا بالشوكة والسكينة

(مش بتضربها مثلثات زي ناس)

لسانها معووج وبتنطق الحروف برقة

بتقول مش رحت.. مش أكلت.. مش عرفت..

بتقول ميرسي

(مش متشكرين يا عم الحج)

■ ■ ممنوع الضحك ■ ■

باااي

(مش سلامو عليكو)

وبتقول زي ما بأقول لحضرتك يا تااوونت

(مش زي مبؤلك كده يا طاانط)

بتقعد على طراطيف الكرسي وبتسلم بضوافرها.

مش بتعرف يعني إيه تقليبة وفتة وبرايم وياااي بقى.

بتفطر كورن فليكس

(مش سندوتشات الفول)

مش بتأكل رنجة وفسيح

(فاتها نص عمرها)

عمرها ما نضفت ولا سمك ولا فراخ

(في دي يا بختها)

كل شنطها من عند

■ ■ ممنوع الضحك ■ ■

Abo Nesma

(ماركة وكده)

والشوزات من عند

Happy gazma

(دي جزم فرحانة وبتمشي لوحدها)

جدها أصله تركي وجدتها جبنة تركي

خال مامتها عنده فيلا على ترعة المحمودية

(وفي معدية..أأأأ.. قصدي لانش)

دي مواصفات بنات الناس حسب تقييم الناس

على فكرة

المحجبة المحترمة المتربية اللي بتمشي زي الملاك وما تحسش

بيها برده بنت ناس

واللي بتغض بصرها مش علشانك..علشان ربنا.. برده بنت ناس

■ ■ ممنوع الضحك ■ ■

واللي بتغير طريقها وتمشي من طريق أطول علشان ما تعديش
على قهوة.. برده بنت ناس
واللي ساكنة في بيت بسيط ولبسها بسيط وما تعرفش ماركات..
برده بنت ناس
واللي بتأكل فول وطعمية وشاطرة في التقلية بنت ناس
واللي بتكعبل في عبايتها علشان طويلة وجزمتها كوتشي.. برده
بنت ناس
واللي ما بتعرفش فرنساوي وبتقول شكرا ومتشكرين.. برده بنت ناس.
وسلامو عليكو.



■ ■ ممنوع الضحك ■ ■

25

مشية الستات

للسات أكثر من مشية عارفينهم؟

❖ مشية البطة المرممة

ودي لما الست من دول بتلبس كعب عالي وهي هلامية حبتين
وغالبا الجيبة أو الفستان بحزام فيه سلاسل وفيونكات وبتحصل زلازل
وبراكين واهتزازات زي عروض فرقة الفنون الشعبية كده.

وألف مبروك

❖ مشية العسكري

دي بنوثة طيبة بس هي خجولة جدا هاتلاقوها مندفعة ومايشة
بسرعة وحاضنة الكتب ولابسة كوتشي وما بترجعش لورا

■ ■ ممنوع الضحك ■ ■

ومخضوضة وبتبرق وبتبص حوالها كثير زي المدمنين ودي غالبا
بتقع وبتكعبل في رباط الجزمة
وعندها إصابات كثير.

وألف سلامة

❖ **مسية البجعة**

ودي أعراضها بتظهر لما البنت بتلبس جزمة الباليرينا الفلات دي
بتاعة البالية ووقتها بتكون مقتنعة إنها بجعة من اللي بيغرقوا في
بحيرة البجع ما تقلقوش وسيبوها تعدي الشارع حتى لو على طراطيف
صوابعها ولما توصل سقفلها.

وربنا يهدي

❖ **مسية البرنسية**

ودي سايحة..أأ.. قصدي عندها إحساس إنها من السياح وبتتفرج
على الناس في الشارع كأنهم تحف وآثار فرعونية وبتشيل شنطة إيديها
قصيرة وتعلقها في ذراعها، وبتلبس كعب عالي جدا ونضارة شمس

■ ■ ممنوع الضحك ■ ■

وعقد كبير أد كده على صدرها وتعتقد الطرحة زي ماجدة في الأفلام
بتاعة زمان

وربنا يشفي

❖ مسية بنت الدايرة

مش عارفة ليه بيقولوا على الست الوالدة كده رغم إن هي اللي
دايرة مش مامتها

ودي أصلاً سرحانة وبتمشي على مهلها في خطوط لولبية غير
مستقيمة ورجليها بتلف على بعضها وبتتفرج على كل الفتارين
والمحلات وفي الآخر مش بتشتري حاجة.

وربنا على الظالم والمفتري

❖ مسية المثلث

ودي ثنائية غالبا بيكونوا أختين

أو بنتين أصحاب أوي

هاتلاقيهم ماشيين لازقين راسهم في بعض ودي راس المثلث

■ ■ ممنوع الضحك ■ ■

وجيياتهم أو العبايات نازلة على واسع ودي قاعدة المثلث
والأقصر منهم متشعلقة في دراع الطويلة وكل شوية يتوشوشوا
ويضحكوا

ولو لابسين كعب عالي بيعملوا دوشة
ولو لابسين فلات.. الطويلة منهم بتتكعبل في القصيرة وبيقعوا سوا
اعترفي وقولي إنتِ بتمشي إزاي.



الشاويش عطية

على فكرة مش شاويش ولا عطية ولا غير.. إنها جميلة وبنوتة..
وما بينكدهش على البنات إلا الكلمتين دول
البسي يا حبيبتي كده وأنت خارجة وحتي في وشك حاجة
طول ما أنت عاملة كدة ما حدش ها يوصلك
ومش ها تتجوزي وقصري الطرحة دي
ولو البنت فتحت بقها وقالت كلمة
يقولوا لها... خليكى قاعدة وخلي الحجاب ينفعك!
كل الشباب والرجالة ما بيحبوش المقفلة.. يا مقفلة
والمشكلة إن في شباب بيسمع وبيعمم وخلص ويبقى محترم
ويقول لك أنا عاوز عروسة فاهمة

■ ■ ممنوع الضحك ■ ■

بلاش المقفلة قوي دي

لا هي مش مقفلة إنتوا اللي مش فاهمينها!

مش معنى إنها بتخرج بالحجاب أو النقاب قدام الشباب الغرب
تبقى غفير.

مش مخبية جوز فراخ تحت العباية على فكرة ومافيش أرانب
مش معنى إن طرحتها طويلة ومش بتحط ماكياج ولا بسه جوانتي
تبقى شاويش.

مش معنى إن طرحتها عادية ولبسها بسيط تبقى ما عندهاش أنوثة.
مش معنى إنها جدعة وبتعتمد على نفسها تبقى راجل.
مش معنى إنها واثقة في نفسها تبقى غفير.

لو شديت ودنها حاتسقف زي البنات الجمال اللي ماشيين في الشارع.
ولو خبطتها على مناخيرها هاتغني
ولو كعبلتها هاتحط مونوكير
ولو شديتها من حدودها هاتضحك
ولو شافت الروح ها تأكله... أأأ.. قصدي عارفه إنه بيتحط على الشفايف

■ ■ ممنوع الضحك ■ ■

وعندها جيبة والله وفتان بكرانيش
وبتسرح شعرها كل سنة مرة الحمد لله بعد ما تستحمى في العيد الكبير
عارفة الفرق بين البارفان والجلانس
وعارفة إن البيروسول مش مزيل عرق
عارفة المودة.. أو الموضة
بتحب اللون البيك
(كل البنات بتحبه مش عارفة ليه)
بتحب القطط والدباديب
(وبتشترى ماديليات وسلاسل وعقود كتير)
بترسم ورد وهي بتذاكر وخطها منيل
بتقرأ شعر
(هي مش فاهماه بس بتحاول)
إيديها أصغر من إيديك ورقيقة
زيها زي البنات الروشين ويمكن أحلى كمان،
بترقص مع البنات صاحباتها وبتسقف وتغني بس لما بيكونوا في البيت

■ ■ ممنوع الضحك ■ ■

نفسها تعيش

هي بس عارفة إن نظرة رضا من ربنا أحسن من مليون نظرة إعجاب
من الشباب اللي في الشارع.

ساترة نفسها ومحافطة على الأمانة ويوم ما تكون زوجة هاينزل
القمر ويغسل المواعين وينور في البيت.

مش لازم تلبس بنطلون وتعمل لنا انبهار في الشارع

مش لازم وهي خارجة تطلع نص شعرها من الطرحة وترسم عينيها
زي كيلوباترا علشان تبقى بنوثة

مش لازم تلبس إكسسوار كإن حنطور ماشي في الشارع علشان
تلفت نظرك

هي ممكن تمشي وما تحسش بيها لأنها مستورة

والله بنوثة

بلاش تظلموها.



غلطة

أحياناً لما بتيجي تدور على نصك الثاني
بتحتار شوية
ساعات بتسأل وتعرف عنه غلطة
تقوم تتعقد من كل البنات أو كل الشباب
غلطة!

في ناس بتغلط بس ما نقدرش نعمم الغلط علشان إنسان واحد
(ملتزم ظاهرياً) غلط غلطة
وبياكل والعياذ بالله ترمس في الشارع
وبيشرب استغفر الله العظيم يارب فانتا بالتفاح
أو أخت محجة أو منتقبة استغفر الله العظيم بتأكل جيلي كولا

■ ■ ممنوع الضحك ■ ■

يبقى كل الملتزمين كده.

لأ طبعًا

على فكرة بقى

مافيش عريس متدين 100 % لدرجة إنه بيطلع نور من ودانه

ومافيش عروسة متدينة لدرجة إن مناخيرها بتنور

(بغض النظر عن إن دماغها بينور بالطرحة الفسفوري..)

ومش كل شاب بدقن يبقى ملاك من السما..

ممکن يكون بوشين واحد بدقن والثاني لأ

بس في منهم فعلا ناس زي سيدنا يوسف وزى الفل

ومش كل اللي لابسة نقاب أو طرحة طويلة ملاك..

ممکن تكون شريرة وبتغتَاب الناس.

(وفي منهم بنات غسل زي بنات شعيب كده وزى القمر

وفي ناس مش متدينة بس بتحبهم

التدين مش ببيان قوي ومالوش لون ولا ريحة

■ ■ ممنوع الضحك ■ ■

التدين مش بيتقاس بالمترو ولا بالكيلو
الإيمان إحساس جواه
ها تشوفيه إزاي؟
وهو لابس القميص الكاروهات الأخضر وقافل زراير الجاكيت البني
وفارق شعره من النص!
الخشوع جواها
ها تتفرج عليه إزاي من ورا الحجاب!
يبقى لازم نعرف كده من الأول
مافيش حد مثالي
الغلط مش عام
أنت مش ملاك وكمان هو مش ملاك وماحدش بيطيير بجناحات
وقت السحر الخشوع جواكم.
كل واحد فينا جواه خير
ونفسه ربنا يحبه
في أساسيات دي اللي ندور عليها..

■ ■ ممنوع الضحك ■ ■

(طول شعرها مثلاً ومناخيرها صفرة وشعرها أخضر)
وهو فلوسه ومرتبته.. كده يعني)
يووو...أأأ..قصدي.. الأساسيات
الحوار مهم مرة واثنين
والخطوبة أصلاً علشان كده.
أحسن حاجة لما تروح تخطب ولما يجيلك عريس تبقى طبيعي
تتكلم بصراحة وبوضوح
وتسأل سؤال بريء وتشوف رد فعل اللي قدامك
مش عارف تتكلم قول له أنا مش محضر كلام لو حابب تسألني عن
أي حاجة
وكل ما يسألك أو تسألك تجاوب وتقول طيب وأنت؟
وتقلب السؤال عليه
سمعة الإنسان بتفضحه وتسبقه لو كان صالح بيتعرف رغم أنه
ها يشوفوه في المسجد

■ ■ ممنوع الضحك ■ ■

وعمره ما عاكس يارا
وصحابه عارفين إنه مش بيتفرج على تفيدة وهي بترقص
ولو كان خبيث ها تلاقي الناس كاشفاه مثلا
شافوه وهو بيقزقز لب في البلكونة
وكمان شافوه أكثر من مرة وهو بيضرب سندوتشات الطعمية
ومخلص فلوسه عليها وآثار الإدمان باينة على خدوده ووشه.
لازم تسألوا عليه
ما ترفضيهوش علشان مش ملتحي رغم إنه حافظ نصف القرآن
ومصلي وبار بوالديه.
وما ترفضهاش علشان طرحتها عادية رغم إنها لابسة عباية واسعة
وبنخطس وندور في كم العباية علشان نسلم عليها
الأخلاق مهمة قوي
الدين كله خلق فمن فاقك في الخلق فاقك في الدين.



■ ■ ممنوع الضحك ■ ■

28

نوع نادر جدًا

في نوع نادر من البنات
بيبقى عندها إحساس إن أهل العريس فلاحين ومش مودرن
وإن أهلها من طبقة أرقى
وبتبقى هي وأخواتها البنات أو صاحباتها عاملين كده:
- شفتي بيقولوا على البارفيوم بارفان..ههههه
(إنتوا الاتنين غلط أصلا اسمها كولونيا)
- إلحقوا دول جاييين جاتو هو مش المفروض بومبونيرة فضة
وفيها شوكولااااا
وتزعل قوي لو خطيبها مش عارف البانتاكور.. والشيميز.. والتونيك.. وال
*&&/@\$# .

■ ■ ممنوع الضحك ■ ■

وتبص له شذرا لو قال شكرا يا طنط
(أصلها بتقول لمامته ميرسي يا توانت)
وتنكد عليه لو ما جابش لمامتها فإزة كروازينية في يوم الأم
(وممكن تقتله لو جابلها شال صوف)
وتقعد تنتقده وتقول له قول كده وما تقولش كده وهات دي كده
وماتعملش مناخيرك كده واشرب كده.
ولو حماتها سألتها تحبي تأكلي إيه يا ضنايا أعملهولك على الغدا
تطلب بيكاتا بالشامبينيون وساليزون وباستا
وهي مش عارفة اللازانيا دي مرهم واللا شتيمه
ولما تزورهم بتعيش في دور الأميرة وأخواتها الأقرام السبعة
أو بنت السلطان اللي جاية من مملكة الكرانيش
وبتمشي على طراطيف صوابعها جوه الجزمة
وبتشرب المية بالشوكة والسكينة

■ ■ ممنوع الضحك ■ ■

يابنات

ما تصعبوهاش كده وخليها سهلة

دول ناس طيبين

وأهله دول هم اللي ربوه وكبروه لحد ما جه وخطبك وعجبك.

المجد للبنات اللي مش بيعملوا كده



■ ■ ممنوع الضحك ■ ■

29

نصائح لأُم العريس

ابنك رايع يخطب ألف مبروك
دي شوية نصايح من واقع كلام البنات والستات
والصراحة هم أواريب وبيأخدوا بالهم من حاجات عجيبة
شوفي
قولي لابنك ما يفرقش شعره من النص
لو هو متابع مسلسل فاطمة وكريم ومنك لله يا ظالمة
إنتِ السبب ليه قلتيله إن شعره ناعم..
(البنات بتحب العريس اللي مظهره فيه رجوله بلاش الشعر
المسبب وبلاش يستشور)

■ ■ ممنوع الضحك ■ ■

ركزي على الشراب

لو لقيتي الفردتين مش لون واحد

يبقى ابنك عنده عمى ألوان هاتيله فردتين لون بعض..

البنات بتبص للشراب ولازم يكون لايق على البنطلون والقميص.

(الشياكة مهمة)

لو لابس حفاظة وحاطط جل في شعره وفاكر نفسه أحمد حلمي

في الفيلم..

بلاش تكسفي نفسك واهربي

(استني عليه سنتين لحد ما يعقل الأول)

قوليله لما يقدموله كيك أو جاتوه ما يأكلهمش كلهم

وابقي هاتيله وأنتوا مروحين..

(البنات بتستنى اللحظة دي وها تتفرج عليه وها تحكي لصاحباتها

في التليفون..أواريب أواريب)

■ ■ ممنوع الضحك ■ ■

خليه ما يتفسحش بعنيه في الصالون والستارة
والبراويز والسجاجيد وهو بيكلمها.. عيب.. عيب.
(وبطلي أنت كمان)
واستنوا لما يقوموا يجيبوا العصير واتفرجوا بسرعة
لازم يقص ضواقره
لأنهم بياخدوا بالهم منها ولازم يكون نضيف وظريف ولطيف
ويحط بارفان ويلمع الجزمة.
(بلاش الكوتشي وبلاش الصنادل)
(ولو لبس شبشب بصباغ مش ها توافق)
خدوا في إيديكم حاجة
كيس جوافة سبت برتقان.. كيلو شوكولاته أو تورتاية
(لو ما جبتيش ها تقول عليه بخيل وها تمسكهاله وتذله بيها
طول عمرهم)

■ ■ ممنوع الضحك ■ ■

مش لازم بدلة وكرفته هي مش ناقصة خنقة خليه يلبس قميص
ويا ريت يكون مكوي
وبلاش النضارة الشمس
أنتوا أصلاً رايعين بالليل.
مش طول ما أنت قاعدة تشكري فيه، كده كده مش ها يصدقوكي
علشان إنت مامته ما تتعبيش نفسك.
(ووفري صحتك واشربي العصير وأنت ساكتة)
لو اخدتوا معاد ما تلغيهوش
ولا تأجليه لأن بيكون فيه طواريء في البيت
والبنت بتبقى قاعدة بالهدوم من قبلها بتلت أيام والجزمة بكعب
عالي وضيقة ها يدعوا عليك وعليه.
(اتصلي بالتليفون قبلها واستأذني بدوق)
بلاش تقوليلهم إنه كان بينادي على سوبر مان من الشباك

■ ■ ممنوع الضحك ■ ■

وهو صغير

وما تحكيش على اليوم اللي تاه فيه في البحر.

(هي كمان بتأكل المشابك وتاهت في حديقة الحيوانات

ولقوها جنب الزرافة مش كل الذكريات تتحكي لأنه بيتحرج

وكلنا بنغلط)

ماتلبسبش كل الذهب اللي عندك وتستلفي غوايش أختك

لأن لو طلبوا حاجة بعد كده وقولتوا الظروف ما تسمحش هايفكروك

بالغوايش وهي أصلا مش بتاعتك

(ما تتصنعوش وخليكوا على طبيعتكم والصراحة في الماديات

أحسن علشان تبقى عارفة البيير وغطاه).

ماتاخديش معاك حفيدتك بنت بنتك وأول أحفادك..علشان البنات

فاقسين الموضوع ده

(ها تشرب البيبسي وقال إيه عاوزه أعمل بيبي يا تيته وأنت ها

تقولي أصل ما بتدخلش الحمام مع حد غريب، وهاتقومي وتفرجي

■ ■ ممنوع الضحك ■ ■

على الشقة.. فاهمينك يا أروبة)

لو قابلوكم كويس والبنت وأنت ماشية خدتك بالحضن

وباستك من هنا ومن هناك يبقى دي علامة يا مارد

وفي قبول.

ألف مبروك



■ ■ ممنوع الضحك ■ ■

30

لظلوظة المملظة

خليك كده.. طول النهار فى المطبخ ما بتفكرش غير في
الأكل وبس
من صينية البطاطس باللحمة الضاني لطاجن الرز المعمر، ويا
جماله يا حركاته يا تكاته
والا البيتشيفور اللي بتعمليه
كفاية فرجة على قناة الطبخ وبطي تدعي وأنت ساجدة
للشيف فلان
مش هو اللي ها ينقذ حياتك على فكرة.
ما تتصلش بيه في رمضان وتقولي له
(بحبك في الله يا شيف)

■ ■ ممنوع الضحك ■ ■

مش لازم تحكي لجوزك الفرخة بتتنصف إزاي..
بلاش تقشري البطاطس وتقمعي البامية وأنتوا بتتفرجوا على التلفزيون
اعملي كل حاجة الصبح وهو في الشغل يا لظلم
هو مش عاوز يعرف أم محمد جارتكم بتعمل القلقاس بسلق واللا
بالكزبرة الخضرة

حاولي تبصي في المراية قبل ما تجيبي المسلسل التركي وهو قاعد
وخدي بالك من المذيعات لو لقتيها حلوة خدي الريموت وغيري وقولي
زهقنا من السياسة، بلاش أول ما يدخل الشقة تروحي رازعاه معلقة مربى
علشان سُكرك يا حبيبي... خلاص كره المربى.

صحيح لازم يكون طبيخك حلو بس مش طبيخك بس اللي يبقى حلو
ما تسألهموش كل يوم السؤال اللي مدوخ كل الستات.. أطبخ إيه
بكره؟! إنتِ صاحبة القرار ويا خوفي من قراراتك

بطلي تسيطر على تفكيره بحلة المحشي
(كل يا خويا بالهنا والشفأ أنت تشيعييت طول النهار)
اتعلمي تتكلمي وتقولِي رأيك وتثبتي شخصيتك

■ ■ ممنوع الضحك ■ ■

ما تشوشيش أفكاره بطبق الفتة وتهيمني على نظراته بحتة الكنافة
وبعدين تسألينه ببراءة وإنتِ بتقلبي كوباية الشاي
(مالك ساكت كده يا خويا مش بتكلمني ليه)
هو بيكون سامعك كويس بس الأكل كابس على نفسه
حا يزهبق يا لظظ
وحا يكرهك يا حبييتي وممكن نفسه تهفه على طببخ واحدة تانية
نفسه في شوية رومانسية
وأنتِ غرقانة في التقلية
حاولي تقري كتاب وتتنقفي شوية واتفرجي على برامج اجتماعية
الدنيا مش مطبخ وأكل وبس
وعلشان خاطري
ما تتصليش بالشيف اللي بيطلع في التلفزيون.



31

لما يجيلك عريس

يا بنوته.. لما يجي لك عريس.. ما تستخبش ورا المكياج خليه
يشوفك على حقيقتك ويتصدم
أااا.. قصدي يعجب بطبيعتك، وما تلونيش خدودك وما تلبسش
حلق أنت كده بطبيعتك من أجمل ما خلق
البسي فستان أو عباية.. الشاب الغلبان من دول بيتخيلك في
أحلامه بفستان طويل بمبي وديله واسع وزبي الأميرة مش بنطلون بركب
(البنطلون اللي بركب مافيهوش ريحة الأنوثة وبعدين ما ينفعش
أصلاً مع الحجاب)
بلاش كعب عالي قوي لاحسن تتكعيلي وأنت شايلة صينية العصير

■ ■ ممنوع الضحك ■ ■

ويقع على دماغه ها يمشي

خليكى على طبيعتك وبلاش تتصنعي الرقة في الكلام

بلاش أنت (كررت) تعمل إيه اسمها (قررت)..

وبلاش (الاستكرار) اسمه (الاستقرار)

علشان ها يتصدم لما تتكلموا عن (الواكح) قصدي (الواقع)

اتكلمي بالراحة وبهدوء ما حدش بيجري وراكي

الضحك بحساب وما تخييش سنانك وبؤك كل ما تضحكي

(إنّ جميلة ولو مش عاجبه مع السلامة)

لما تكلمي مامتك قدامه ما تبرقيلهاش وتكزي على سنانك

(ها ياخذ باله ويخاف ويهرب)

حاولي تسمعي له

(إديله فرصة يقول كلمتين على بعض منك لله يا رغبة يا مفترية)

لما تقدمي له حاجة ما تراقبيهوش

■ ■ ممنوع الضحك ■ ■

سببیه یآكل وما تركیزش وهو بیلع..الأحسن یزور ویموت..عیب.
لو حضرتی درسین فقه ودرسین تجوید ما تعقدیهوش وتطلعی
عینه.. مش وقته
ما تحسسیهوش إنك المفتش كرومبو
هو مش جاي تحققی معاه.. خلیکی ذکیة فی الحوار مش مهم
تعرفی كل حاجة من أول زیارة
خلی بابا یسأل عنه
لو عریس حلو ومتدین وممتاز ما تتغریش بالمظهر ودوری علی
عیب فیة تذلیه بیه مستقبلاً..أأ.. قصدی ما فیش حد كامل.. یوووه
بقی قصدی ما تنبهریش قوی ویغمن علیکی وتنشکحی فیبان علیکی
فیكرهك وتطفشیه
(اتقلی أنت كمان زی الفل.. خلیکی منضبطة
ما تبقیش مغرورة وتتكلمی من طراطیف مناخیرك وتتكبری علیه
لو هو بسیط

■ ■ ممنوع الضحك ■ ■

بلاش تتعاركي مع أخوكِ حماده قدامه استني لما يمشي واعجنيه
مع أختك الثانية

لو لابس حفاظة وشعره سبايكي ما تكمليش قومي اغسلي المواعين
وروحي نامي

لو اسمه حنفي أو عباس أو من عيلة أبو سحلول ما ترفضيهوش من
قبل ما يبجي ممكن يكون أحسن من اللي بتحلمي بيه.

ما ترفضيش شاب طخين أو أصلع أو بشنب أو أسمر أو صباع رجله
الصغير معووج أو خرمين مناخيره مش قد بعض علشان السبب ده
بس...لازم تقعدني وتتكلمي معاه لأنه بني آدم يمكن يكون في قبول
ويكون الإنسان اللي يسعدك رغم أنفه.. قصدي أنفك

ما ترفضيش شاب محترم ومتدين علشان

ما عندوش شقة خمس أوض وصالتين وحمام دورين

أصلا كفاية الحمام الدورين

مش لازم عربية

■ ■ ممنوع الضحك ■ ■

(ممکن يكون عنده عربية وما عندوش أخلاق.. تختاري إيه؟)

مش لازم تعملوا الفرخ في فندق خمس نجوم

(الناس ما بيعجبهاش مهما عملتي وها يقعدوا يعايبوا على فستانك..

ماله بيت بابا وماله السطوح ده حتى طراوة).

مش لازم تعملي زي حسنية بنت عمك بالظبط كل واحد وله

ظروفه وجواباته واختياراته.

مافيش فارس أحلام حقيقي زي اللي في خيالك وما عندوش قصر

ومافيش حصان أبيض ومافيش مملكة وغالبًا ما بيحفظوش شعر.. وما

عندوش سيف ومش بيحارب..

والله ما هايخطفك

آه والله آه والله آه والله



■ ■ ممنوع الضحك ■ ■

32

ست العرايس

مش لازم

مش لازم تشتري مية وخمسين فوطة وش

وأربعين طقم سرير

وعشر كوفيرتات

وعشر بطاين

وست لحفة فايبر

أصلا مش هاتستخدمي غير اتنين تلاتة.

مش لازم 24 كباية شاي شكل بعض

و24 كباية مية شبه بعض

■ ■ ممنوع الضحك ■ ■

والكاسات اللي بترقص في الضوء لوحدها

والكبايات أم حرف ذهبي

والكبايات اللي بقها معوج

والصينية أم رجلين

وحامل الكنكة!

وغطاء الطشطشة!

ومش لازم طقم الشربات اللي مالوش لازمة وأصلاً ما حدش بيعمل شربات.

مش لازم جميع مقاسات الحلل الألومنيوم والتيفال والطاسات

والصواني اختاري اللي حا تستخدميه بس أنت مش مهاجرة ومسافرة

موزمبيق لما تحتاجي ثاني إبقى اشترى.

مش لازم حلل بايريكس وفيزون وسيراميك و#^&&@

مش لازم الشمعدانين والساعة اللي بيتخطوا على النيش من أول

الجواز هاتوهم حين ميسرة.

■ ■ ممنوع الضحك ■ ■

ساعة الحيط اللي بتعمل دينج دونج مش ضرورية عرفوا أصحابكم
وقرايكم محتاجين إيه وهم يجيبوها هدية.

عادي لو إتجوزتوا من غير ما تحببوا الكاسيت الديجيتال أو أبو
سماعات كبيرة والميكروفون.

مش لازم غرفة الأطفال من البداية وممكن تسيبوا غرفة فاضية
وتقفلوا بابها إيه يعني ولو الضيوف سألوا قولوا لهم دي أوضة الفيران.
ما تروحيش مع مامتك لبتاع البلاستيكات لأنه هايبيع لكم كل
المحل والحاجات مغرية.. هاتي الضروري ورتبي أولوياتك.

مش لازم طقم الصيني

(الأساسي)

والأركوبال

(الاحتياطي)

و الطقم الفاميه

(للمعارف)

■ ■ ممنوع الضحك ■ ■

والميلامين

(للاستخدام اليومي)

ركزي على الصيني وحاجات بسيطة للاستعمال اليومي.

مش لازم تشتري طن مكياج و4 كيلو بارفان وكرتونة إكسسوارات

وجردل مونوكير إرحمي بابا وماما شوية.

مش لازم تفصلي دستتين فساتين

وتشتري دسنة بيجامات شتوي

ودسنة صيفي

وشباشب وقباقيب

وشنط وصنادل وكوتشيات

وشوية عبايات

أصلا وزنك حا يزيد ممكن حاجة بسيطة أو حا تضربي خالص ف

خسارة الهدوم استني شوية.

■ ■ ممنوع الضحك ■ ■

بلاش طرح كثير.

بلاش مفارش مالهاش لازمة.

مش لازم حفلة في الخطوبة وحفلة في الشبكة وحفلة في كتب الكتاب
وحفلة في الزفاف.. خلي كله عائلي والحفلة واجتماع الناس يوم الزفاف.
مش لازم كل الهدوم تبقى جديدة خدي هدومك القديمة معاك ما
حدش ها يحاسبك.

مش لازم تفتحي الدولاب والنيش وكل حاجة والناس تتفرج وتعرف
كل حاجه عندك وتطلع تحكي بره دي خصوصيات وعادة سيئة عاوزين
نبطل نعملها.

اعرفي ظروف والدك المادية

أو مامتك لو هي اللي بتصرف في حالة وفاته

وحطي حدود

واكتبي بالورقة والقلم ورتبي الأولويات

في حاجات لازم تشتريها تبقى أولويات.

■ ■ ممنوع الضحك ■ ■

وفي حاجات ممكن تأجلها
وفي حاجات ممكن تتلغي خالص.
وخصوصًا لو لك إخوات أصغر منك.
إرحمهم وخليكي عاقلة
وارحمي عريسك برده وتوافقي معاه على حاجات الشقة واختاروا
المتوسط سعره وإرضي ووافقي حسب ظروفه لأن وراه حاجات كتير



■ ■ ممنوع الضحك ■ ■

33

هؤلاء مروا من هنا

في بيت كان دافىء قبل أن تنير شاشات الحاسوب
وفي بيوت كانت تعشش عليها أطيار السعادة قبل أن يحدث الآتي...

مر من هنا

هي: محمد

هو: نعم

هي: هاتي جي تتفرج معايه على التلفزيون

هو: حاضر بس أقرأ الإيميل وجاي.. وبعدين ما أنا قريب أهه

افتحي بس واتفرجي وأنا متابع معاك

هي: إيه رأيك؟

■ ■ ممنوع الضحك ■ ■

هو: في إيه

هي: في الموضوع اللي اتكلمت عنه فوزية السبعاوي

هو: معلش كنت مركز في اللي بأقراه.. قوليلي مختصر

هي: كانت بتتكلم عن (....).... إيه رأيك

هو: آه عندها حق

هي: إيه!!! يعني أنا حيوان أليف!

هو: إيه أنا قلت كده!

هي: ما هي قالت إن الستات اللي قاعدين في البيوت دول زي

الحيوانات الأليفة تأكل وتشرب وبس

هو: لأ طبعا إنت ست الستات

هي: ربنا يخليك.. هو انت بتقرأ إيه؟

هو: مواضيع ظريفة جدا

هي: طيب أنا عاوزه أتعلم أدخل على الإنترنت أهو أقرأ شوية

وأسلي نفسي

■ ■ ممنوع الضحك ■ ■

هو: ليه.. هو انت عندك وقت؟

هي: أصلي بأزهق وكمان إنتَ دايما مشغول عني بالنسبة ومش

بتتكلم معايه

هو: ليه بس ما أنا معاكِ أهه.. وبعدين بلاش اختلاط على النت..

ده مليون بلاوي

هي: بس...

هو: لأ... بلاش إنترنت

وفي تلك اللحظة كان يكتب ردا على صديقة له كتبت منذ لحظات:

(أنا زهقانة) أراد أن يخفف عنها وبدأ يكتب بينما كانت زوجته

تفرك يديها أمام شاشة التلفاز وقد ظهرت على وجهها علامات الألم

وقالت بصوت واهن

هي: محمد.. أنا زهقانة.. ومخنوقة.. تعالى اتكلم معايه شوية

هو: طيب بس أخلص أصلي بأكتب في موضوع مهم

مرت من هنا

■ ■ ممنوع الضحك ■ ■

هي: بس.. روح هات التليفون علشان نطلب أكل جاهز
حماده: أهه لتليفون.. ماما هو حضرتك عاوزه الصفحة اللي بتكتبي
فيها دي؟

أصلي ها أفلها وألعب شوية على الكومبيوتر
هي: صفحة إيه
حمادة: كيف تتحاورين مع أبنائك وكيف تطيعين زوجك
* * *

مر من هنا
الأم: تك تك تك.. يا أسامة
أسامة: أيوه يا ماما
الأم: إصحي يا بني.. طول النهار نايم
أسامة: يا ماما ما أنا كنت سهران طول الليل
الأم: طب قوم أقعد معانا شوية
أسامة: يا ماما عاوز أنام... حرام أنام يعني

■ ■ ممنوع الضحك ■ ■

الأم: خلاص يا حبيبي.. نام

أذن العصر

الأم: تك تك تك.. أسامة

أسامة: يوووه... أيوه يا ماما

الأم: يا بني العصر أذن من ساعتين وانت ضيعت الظهر.. قوم الحق

العصر قبل ما المغرب يؤذن

أسامة: حاضر حاضر. اعملي بس الشاي

ومرت الساعات واستيقظ أسامة بعد أن نام الجميع

جمع كل الصلوات ودخل إلى المطبخ ووجد طعامه ملفوفا بعناية

ومغطى بفوطة بيضاء

أكل وحده

وشرب الشاي وحده

وسهر وحده

ونام بالنهار وحده

■ ■ ممنوع الضحك ■ ■

بعد أن قضى الليلة كلها على الحاسوب يدرش مع أصدقائه
ويتحاور ببراعة
ولم يفته أن يشكر صديقه على موضوعه الذي طرحه وكان عن (البر
بالوالدين)

* * *

مرت من هنا
تررررررررررر
دق جرس المنبه
هي: أحمد.. أحمد.. قوم علشان معاد الشغل
هو: حاضر.. اعلميلي القهوة بسرعة
هي: من عيوني
هو: تسلم عيونك
هي: آدي القهوة.. وآدي القميص كويته.. وآدي الجزمة لمعتها
هو: تسلميلي يا ست الكل

■ ■ ممنوع الضحك ■ ■

هي: ربنا يخليك لينا يا رب ويكرمك

هو: عارفه يا زكية أحسن حاجة إنك مش بتشتغلي.. مش عارف لو

كنتي بتشتغلي كنت ها أعيش إزاي

هي: ليه

هو: بأغير عليك.. والغيرة بتأكلني لما بأفكر إنك واقفة تنشري بس

في البلكونه.. تخيلي بقى لو خرجتي..ها أموت

هي: بعد الشر عليك

هو: أنا نازل

هي: ممم.. ممكن أدخل النت شوية

هو: مش إحنا اتكلمنا قبل كده وقلت لك أنا بأزعل من حاجات معينة

هي: صدقني أنا بأقرا كتير وبأستفيد وبأكتب في مواضيع حلوة

هو: لأ...مش موافق

وخرج زوجها ورن الهاتف

تررررررررر

■ ■ ممنوع الضحك ■ ■

هي: ألو

صاحبها: إنت فين؟

هي: معلش مش ها أقدر أدخل

صاحبها: ليه؟ برده جوزك مش موافق؟

هي: أيوه

صاحبها: أدخلي وهو مش موجود.. بالنهار يعني.. ومش لازم

تقوليله.. وبلاش خالص لما يكون في البيت

هي: تفتكري

صاحبها: هو احنا بنعمل حاجة غلط!!! وبعدين اللي بنكلمهم

متجوزين ودول زي اخواتنا

هي: عندك حق.. ثواني وجايلكم

* * *

ترى

كم مرة تنظرين أختي في وجه ابنك وهو يكلمك

■ ■ ممنوع الضحك ■ ■

وهل عدد مرات نظرتك للشاشة أكبر أم أقل؟
وكم مرة تتحاور مع زوجتك في أي شيء نتحاور فيه هنا؟
وهل تتحاور معها كما تتحاور مع الأشباح التي تخاطبها على الشاشة
وكم مرة تتابعين كلمات زوجك كما تتابعين كلمات صديقاتك
على المنتديات

وهل تعملين بما تنصحين به
وكم عدد المرات التي رددت أمك فيها عن باب حجرتك يا بني ويا
أخي الشاب

وهل بقي من عمرها من اللحظات ما يكفي لترضى عنك
دعونا لا ننساهم
وتذكروني
فقد

مررت من هنا!



■ ■ ممنوع الضحك ■ ■

34

احترس من المهلبية

المهلبية هي علاقات هلامية جيلاتينية على شبكة التواصل الاجتماعية
وبتلاقيها ملخبطة وفيها حاجات بتمشي وكلايغ
لأنها صحوبية بين اتنين في شات ورسايل مستخبية وتالتهم
شيطون الخناس

وتعالوا نشوف مثال:

مهلبية سادة

- جوجو وتيتي

اللي هم (جابر) وفتحية

ودول بيحبوا بعض من سكات على الفايسبوك وفاكرين إن ماחדش

■ ■ ممنوع الضحك ■ ■

واخذ باله

هو يحط صورته بالقميص المشجر وهي

like

وهي تحط صورتها بالعباية البرتقاني أم كسر وهو

.like

والكومنتات بتسيح خالص وفي رسايل خاصة

وبابا قاعد يدفع فواتير الإنترنت وماما فاكراها بتذاكر

وبعد الشات اللي كله حب بيقول لها

لا إله إلا الله

وبتقول له

محمد رسول الله

مهلبية بالآيس كريم

- فيفي متجوزة وعندها 38 سنة

■ ■ ممنوع الضحك ■ ■

ورامي 25 سنة

(هي تقول له ياخشى كميلا وحا اشوف لك عروسة..

وهعههع.. وديجي ديجي دو...

على فكرة

هو مش زي أخوك الصغير

ولا ابنك

وحا تنزلقي قصدي تنزلقي في الشات وممكن تتكسر رقبتك.

مهلبية بالمكسرات

- حمادة متجوز وشوشو متجوزة

والشيطان بيزحلق هنا خالص وممكن حمادة يقعد يكتب بالساعات

ل شوشو علشان عندها مشكلة مع جوزها

أصله جرح شعورها لأنه بياكل البطيخة مراكب مراكب مش

مكعبات بالشوكة وبتفضفض لحمادة وهي سائدة على الممكنة ورابطة

■ ■ ممنوع الضحك ■ ■

راسها بالإيشارب الأخضر وبتعيط..

علشان بتثق فيه

وحمادة غرقان في المهلبية وفاكر نفسه بابا ضياء بتاع برنامج

ماذا تفعل لو كنت مكاني

وقاعدة بالبيجامة الكاستور المقلمة وشعره منكوش وبيكلمها على

الشات وسايب مراته دمعتها على خدها..

طب مش تشوف نفسية مراتك الغلبانة الأول

واللي ها تتسأل عليها قدام ربنا.

صديقتي الحبيبة والغالية:

تعالى وفضفضي معايه أنا واخواتك

معانا أم محمد وأم أحمد وأم سارة وأم رامي

وفاضل لنا أمنا الغولة ونبقى كملنا الطقم

وممكن نعمل جروب ونسميه

■ ■ ممنوع الضحك ■ ■

فضفضي براحتك يا حبيبتي
ما تفضفضي لواحدة ست أهي حنينة برده
هو لازم راجل!
بلاش المهلبية
وخليكي في الرز بلبن
وتعالى فضفضي لاختواتك
إحنا هانريحوكي يا شابة



■ ■ ممنوع الضحك ■ ■

35

أشياء تعين على خفض البصر

ركزوا كدهون

علشان تقرب من ربنا

الآباء

مش لازم تسأل على مستوى ابنك الدراسي كل يوم ورايح جاي ع

المدرسة...عرفنا إنك أب صالح

كفاية

(الأبلة حلوة وبتحط روج)

ومراتك الغلبانة بتحل الواجب وطالع عينها.

الشباب

■ ■ ممنوع الضحك ■ ■

وأنت ماشي في الشارع بص على جزمتك وعد بلاط الرصيف
وما ترفعش راسك إلا وأنت بتعدي الشارع بس
الناس حا تفتكرك مفكر أو كاتب وكده وحا تتشهر بعد فترة بإذن الله.
(قول يا رب)

البنات

خليكي خجولة وبصي في الأرض ودوري وبحلقي
يمكن ربنا يرزقك وتلاقي جنيه هنا واللا هناك
حا ترزقي إن شاء الله
المثقفين

لو أنت ما شاء الله مثقف ومتابع النشرة أو برنامج حوارى من دول
والمذبة حلوة
ركز في شريط الرسايل
مسلي وجميل ويحكوا حكايات

■ ■ ممنوع الضحك ■ ■

بلاش تنقل نظرك مباشرة من على وش المذيعة وتبص لمراتك فجأة
إديها فرصتها دي غلبانة ولسه غاسلة المواعين
ونفسيتهها تعبانة
بص للنجفة لحد ما المذيعة تمشي وأمرك لله.

الستات

ركزي على الكرافتة بتاعة المذيع أو ودان البطل لو متابعة مسلسل
وبالمتابعة ها تعرفي مين بيكرر الكرافتات ودي تمارين للذاكرة
وبلاش تركزي مع إيدين المذيع لو متعصب علشان ها تدوخي
وممكن تتحولي بس مش مشكلة.

النضارات

لو أنت بتلبس نضارة أبشر
اقلع النضارة واتفرج وإدعيلي
هاتشوف طشاش بس ها تبقى سامع كويس ما تقلقش.

■ ■ ممنوع الضحك ■ ■

(اعتبره راديو أجدادنا كانوا عايشين من غير تليفزيون وكانوا زي الفل)

العائلات

لو المشكلة في جوزك وللأسف مدمن مسلسلات وأفلام

خلي حركاتك سريعة

أول ما البطلة تيجي إخطفي النضارة

وقولي بصوت مصطنع رقيق تصحبه نبرات الحنان واحذري من

نظراتك:

الله يا حبيبي

باحب شكلك من غير النضارة

ها يفرح بنفسه وينسى البطلة.

(مؤقتًا)

الرياضيين

بلاش تتابع الأولمبيكات

■ ■ ممنوع الضحك ■ ■

أيون
وتعمل رياضي
في جمباز وبنات ومايوهات
وأنت كنت عارف من الأول... يبقى قاصد وسيئاتك ها تزيد
تابع كل الألعاب الثانية وبلاش دي.
(وأنتِ إلغي القناة وجوزك في الشغل)
ربات البيوت
لو لقيتي واحدة من بتوع
سيداشي أنساتشي ساداتشييني
إخطفي الريموت ما تسكتيش
وهاتي سبيس تون للعيال.
اشتري له جرايد.. القراءة للجميع
وخدي بالك من جوزك

■ ■ ممنوع الضحك ■ ■

مش لازم قناة فتافيت طول النهار..

لأن اللي بيحرففتوا ويفتتوا ويتفتفتوا

ستات ومستشورين ولايسين

وأنت ماسرحتيش من أول إمبراح

الزهقانيين

بلاش برامج الرياضة للجميع بتاعة كابتن سماسم اللي لابسين

استرتش دول وبيقفوا صفين وبيتنططوا ويترقصوا

قال إيه تمارين للمفاصل ووجع الظهر والرقبة عيب كده

وأخيرًا

ما تبصش للحرام

علشان تعرف تشوف ربنا

وتفتح عينيك في الحلال



■ ■ ممنوع الضحك ■ ■

36

كلام للمكلبطين

أيون مكلبطين..

ركزوا معاية

لحد إمتى حاتفضلي حساسة؟

ولحد إمتى حضرتك هاتزعل!

سيبك منهم وحب نفسك وحببي نفسك

ماهو لو فضلت قاعد في عزلة وحاطط إيدك على خدك وما

بتقابلش حد

إنت بس اللي هاتتوجع.

إنت بس الخسران

هاتحرم نفسك من الحياة وتفضل منتظر نجاح الريجيم.

■ ■ ممنوع الضحك ■ ■

مكسوف من نفسك ليه..هو الطخن حرام!

ما تتكسفش إلا من حاجة حرام

ممنوع الاكتتاب

ممنوع الحزن

ممنوع إنك تتقمص لو حد قال لك اللبس ده مش مناسبك وخصوصا

لو من عيلتك خدها بروح رياضية

اضحك معاهم

لأنهم بيحبوك وفكر في رأيهم.

البس لبس واسع وشيك

اعرف إزاي تداري عيوبك

بلاش بنطلونات ضيقة يا طماطم

وبلاش القميص والبدلة الضيقة يا بطاطس

عارفين رجاء الجداوي...عارفينها.. صح

طول عمرها شيك!

■ ■ ممنوع الضحك ■ ■

عمر ما طخنها منع إنها تلفت نظرنا بشياكتها ولبسها ولونه
بتعرف تخبي عيوبها
البي اللي يناسب جسمك وانبسطي مع البنات..وعقود بقی
وإشارات وعيشي حياتك
ولما تخرجي حافظي على الحجاب.
عيش حياتك وبلاش تزعل
على فكرة دمكم خفيف
ما اعرفش ليه بس هو كده
الطخان زي العسل وروحهم خفيفة
لو حبيت نفسك وتقبلتها
ها ينجح الريجيم
آه والله
وها يبقى سهل..لأن معنوياتك مرتفعة
ولأنك فرحان ومرتاح نفسيًا

■ ■ ممنوع الضحك ■ ■

عزيمة بقى وإصرار وكده
ما هو لازم برده ننظم أكلنا علشان صحتك أصل الصحة نعمة
خلاص
من النهارده لازم تضحك
بص لنفسك في المراية وكلمها
قول لها أنا بحبك وحاساعدك
ابتدي رجيم وكافيه نفسك كل أسبوع مرة.. واكتب لنفسك لما
تخس كلام جميل
امشي كثير وسبح واستغفر وأنت ماشي
ولو مرة حد سخر منك أو زعلك كبر دماغك
وعلى رأي المثل
البنيت اللي ملهاش حدود ملهاش وجود



احتفال بريء

دار حوار ساخن في أحد المصالح الحكومية حيث دلفت إحدى الموظفات
لباسها الأنيق وقوامها الرشيق وعطرها الفتان فأدارت رؤوس الجميع
وكانت نهاية اليوم عودة الأستاذ "منير" إلى بيته ساخناً على زوجته
التي ذهب بريقها بسبب الحمل المتكرر
وصارت كئيبة كما همس لنفسه وهو يصعد الدرج خطوة... خطوة
وأخيراً وضع المفتاح في الباب.. وأداره ليدخل وقال بخنوع:
- السلام عليكم.. مالك يا حبيبتي؟
قالت بألم:
- أهلاً يا منير.. ما نمتش ولا ثانية يا منير العيال زي القروء من

■ ■ ممنوع الضحك ■ ■

ساعة ما انت خرجت وهم على دماغي

قال برثاء:

- معلش ربنا يعينك..ب.. بأقول لك إيه

ردت وأحد أبنائها يتسلق كتفيها:

- أيوه يا حبيبي

قال بحزم:

- إحنا لازم نبدأ ريجيم من بكره

ردت بهدوء وهي تحاول أن تكتم صرخات الألم بعد عدة لكلمات

من ابنها على ظهرها وهي تتحدث:

- وماله يا حبيبي..نبدأ

قال بحماس شديد وقد بدا البريق في عينيه:

- وإيه رأيك تقصي شعرك وتضربيه في الخلاط من زمان ما شفتكيش كده

أجابت ببرود:

- حاضر من عنيه بعد ما أخلص تطبيق الغسيل ها أنزل أقص شعري

■ ■ ممنوع الضحك ■ ■

قال بانهار:

- وعاوزك كده تلبسي فستان جميل جميل آخر حاجة.. وحطي مونوكير

قالت بصوت مشروخ:

- حاضر يا حبيبي بعد ما أغسل المواعين ها أنزل أشترى فستان

بكرانيش وها أحط مونوكير

قال وهو يرفع حاجبه الأيسر:

- وحطي روج

أجابت في خفوت:

- حاضر ها أكوي قمصانك وأروح أحط روج

أضاف وهو يرفع حاجبه الأيمن:

- واعملي حاجة في دماغك

أجابت ببهجة مفتعلة:

- حاضر ها ألمع النجفة وألبس الأباجورة في دماغي

أضاف أخيرا:

■ ■ ممنوع الضحك ■ ■

- وركبي رموش...عاوز رموش..رموش
ردت وهي تجزّ على شفيتها وابنتها تجذبها من شعرها:
- حاضر يا حبيبي... رموش رموش
واتجه إلى غرفته حيث نام لساعات طويلة، وفجأة وبعد أذان
المغرب بلحظات استيقظ على صرخة مريعة..
فتح عينيه فإذا الغرفة مظلمة، والدخان منتشر في كل مكان،
ورائحة الحريق تملأ أنفه، حاول أن يتحرك من مكانه
فإذا بها تنقض عليه وتمسكه من كتفيه
قال بفزع وقد ارتعدت فرائصه:
- فيه إيه... إنت مين؟
قالت بدلال:
- أنا يا حبيبي
ازدرد ريقه بصعوبة وقال:
- عينيك مالها وإيه الأسود اللي حوالها ده؟.. وشعرك ماله إنت

■ ■ ممنوع الضحك ■ ■

اتكهربتي؟ وإيه الأحمر اللي حوالين شفايفك ده... ولايسه جلابيتي البني
ليه ومين قطع كامها كده؟

قالت بفرح:

- مش انت عاوز رموش وأسود وأحمر وكرانيش

قال وهو يرتجف:

- آه يا سوادي قصدي يا حياتي.. بس ليه...؟

قالت بدلال:

- أصل النهارده الهالوين يا حبيبي.

* * *

«خفف عن زوجتك الضغط والمسئولية وهي ها تلاقي مساحة

وتهتم بنفسها من غير ما تطلب»



■ ■ ممنوع الضحك ■ ■

38

حقك عليه

كلمتين ما يطلعوش إلا من قلب بيحب بجد
قلب نضيف، بيبقى جاي يصلح لأنه مصالح نفسه
ساعات تتخانق مع شريك حياتك
زوجك... زوجتك

نصفك الثاني زي ما بيقولوا.. والأصح (كلك) الثاني ما هي خلاص
بعد الجواز والحب مابتبقوش نصين بتبقوا حتة واحدة علشان كده
بتتوجع قوي لما بتزعل منه.

بتزعل وتبعد وتسكت وتفكر وتفكر
وتحس إنك بتتحرق.

■ ■ ممنوع الضحك ■ ■

ولو حد حاول يهديك مش هتسمعه ولا هتشوف كلامه لأنك بتبقى
عاوز تحكي بس اللي بيوجعك..
عاوز حد يسمعك.

وعلى فكرة مش هترتاح مهما اتكلمت ومهما بكيت؛ لأنك مش
هترتاح إلا لما تتكلم مع اللي أنت أصلا زعلان منه.

الشیطان مش هيسيبك وهيفكرك بكل غلطة وكل هفوة
وممكن حاجات أنت وقتها اتصرفت بحكمة وعديتها وأخذت ثواب..
بس إبليس اتغاض وعاوز يحبط لك ثوابك ومش هيسيبك.
وهتلاقيك بتقول لنفسك وللناس:

(أنا) عملت مرة

و(أنا) سامحت مرتين

و(أنا) ما رديتش في اليوم الفلاني

ومش كفاية إن (أنا) استحملت كذا وكذا

■ ■ ممنوع الضحك ■ ■

طب وبعدين! ولحد إمتي؟

فاكرة.....؟

فاكر لما شفتها أول مرة، لما رححت تخطبها.. ركز.. وافتكرو
مش قصدي أول نظرة، لأ... أول دقة قلب في صدرك حسيت بيها،
وأنت بتتكلم معاها وعرفت إن هي دي
خطفة كده في روحك..
بتبقى عاوز تحط إيدك على قلبك علشان تمسكها قبل ما تهرب
من فرحتك...

بتزعلها ليه بقى.. دي حبيبتك

طيب مش بتسامحها ليه... سامح وعديها.

فاكرة.....؟

فاكرة لما كنتي بتحسي إنك طيارة في السما وسط السحاب وعاوزة
تحضني كل الناس وتتنططي من الفرحة علشان هو اتصل بيك وقال لك بحبك..

■ ■ ممنوع الضحك ■ ■

مش ده جوزك حبيبك..

بتزعليه ليه؟

طب مش بتعديها له المرة دي ليه؟

ما تقولوش كرامة

« الحب بين الزوجين مافيهوش كرامة، في صحيح مسافات وزوايا
بتتظبط من قبل الجواز، لما بتروح تخبط على باب بيتها وتختارها صح،
بنت الطيبين ومتربية وعارفة يعني إيه (أصول) ولما بتوافقي عليه
لأنه على خلق ودين مش منظر وبس، ساعتها بيبقى في رصيد قديم،
ومواقف تتشال على الرأس، وكلام مايتنسيش
كلام حلو، وحاجات حلوة كمان كثير.»

افتكر كام مرة فرحت مع (كلك) الثاني، افتكر السكينة اللي انت
مفتقدها دلوقت وانت زعلان معاها، مش هترتاح على فكرة إلا لما
تتصالح معاها... كلنا كده.

في مساحة ود ورحمة لازم تفضل في كل بيت وكل قلب

■ ■ ممنوع الضحك ■ ■

عندها بتنسى كرامتك وتقلع التاج اللي على راسك وتمشي حافي

ما حدش أحسن من حد

إنت وزوجتك

وانت وزوجك

مش عيب ولا حرام إنك تقول أنا أسف

(حقك عليه)

اتشجع وقولها وأنت ثابت وخذ نية

خدها لله

قول لحبيبك.. حقك عليه

ويا بخت اللي يسبق ويأخذ الثواب والأجر.

اللهم أنزل السكينة على بيوتنا جميعا وبيوت المسلمين

واسعد كل زوجين.



■ ■ ممنوع الضحك ■ ■

بسرعة وهي تطير كالفراشة، استقبلها بابتسامة هائلة وقاد سيارته
بتهور وكأنه شاب مراهق!

بدأ يضحك ويغني ويهمهم ويحدث نفسه..

لم تفهم منه شيئاً.

سألته وهي تتعجب:

هو إحنا رايعين فين يا حبيبي؟

أجابها وهو يبتسم ابتسامة ماكرة:

مفاجأة.

تسارعت دقات قلبها وأخذت تفتش في ذاكرتها عن تاريخ اليوم

هل هو يوم ميلادها...لا

هل هي الذكرى السنوية لزوجهما..

لا لا لا

ارتابت قليلا وابتلعت ريقها بصعوبة فهي لن تحتل

ربما هي فعلا المفاجأة التي تنتظرها منذ سنوات

■ ■ ممنوع الضحك ■ ■

وجبة غذاء أنيقة، في مطعم فاخر، على مائدة مستديرة، عليها
شموع، ووردة حمراء، وبطريقة رومانسية سيقول لها
(زوجتي، زوجتي، أنتِ حبيبتي أنتِ).
التفتت إليه وقالت بدلال وبضحكة خجولة لطيفة:
عرفت يا شلبي حا تغديني في مطعم سحتوت..صح؟
غضن حاجبيه وأجابها وهو يدير زر الراديو باحثاً عن إذاعة الشرق الأوسط
وقال بصوت مخنوق:
لا يا شلبية.. كارفور عامل عرض على زيت كالالا على كل إزازتين
كيلو رز هدية
قلت آخذك بالمرة نجيب لوازم البيت قبل زحمة رمضان.
كل سنة وأنتم طيبين.



الوردة الحمراء

وأخيراً.. شعر بحنين، ودق قلبه، وتذكر أول مرّة رآها بالفستان
الوردي، قرر أن يشتري لها وردة وهو في طريقه إلى البيت،
أسرع يقود سيارته إلى محل الزهور المشهور الذي يقع قريبا من بيتهم،
وترجل من سيارته وهو يغني:
اسبقني يا قلبي اسبقني
تيرا رااا
على الجنة الحلوة اسبقني
قرر أن تكون الوردة حمراء رمزا لحبه لها فانتقاها بعناية وقبّلها
وهو يضعها بجواره وهو يقود سيارته متجهاً إلى البيت.

■ ■ ممنوع الضحك ■ ■

هرول على الدرج وفتح الباب
وانطلق مشتاقاً يبحث عنها هنا وهناك
أين أنتِ يا أميرتي؟
أخيرا وجدها في المطبخ
اقترب بحنان وهمس في أذنها:
- حبيبتي أنا جيت لك وردة
أجابته بمرح:
- الله.. حلوة قوي يا حبيبي
ثم أزاحت بلطف دموعها التي سالت من تقطيع البصل بأطراف أناملها..
وبحركة خاطفة.. مسحت أنفها بكم جلابها بعد أن شهقت شهقة
عميقة فوق حلة الملوخية
ثم أشارت إلى صدره بالسكين وقالت بتهديج:
حطها هناك على الرخامة يا حبيبي لحد ما أخلص التقلية وأنا ها

■ ■ ممنوع الضحك ■ ■

أشمها بعدين،

وخذ في إيدك طبق الممبار والفتّة وحطهم على السفرة
وخليك قاعد لحد ما آجي لك لاحسن العيال يكبوا الشوربة على
الأرض...

وقبل ما تمشي حط الوردة في شوية ميه.

قال برثاء:

- الوردة خلاص ماتت يا حياتي.

* * *

« شجعي زوجك يعبر عن مشاعره.. الحياة مش مطبخ وبس »



■ ■ ممنوع الضحك ■ ■

41

في الركن البعيد الهادي

اختاري مكان هادي في البيت

كرسيين وتراييزة

هاتي ورقة وقلم

نادي جوزك وقعديه

هزي اللمة

وبرقي

خدي نفس عميق واسألوه الأسئلة دي وخليه يختار إجابة من الثلاثة:

← السؤال الأول

♥ لو أنا مت بعد الشر عليا يا مبيبي هاتعملك إيه؟

1 - طبعا هافرح وأتجوز واحدة تانية.

■ ■ ممنوع الضحك ■ ■

- 2 - هافضل حزين طول عمري ومش هاتجوز ثاني.
3 - هازعل شوية وبعدين للأسف هاضطر أتجوز..علشان العيال
لو اختار الإجابة الثانية يبقى بيخاف منك
وأنت شخصيتك قوية
(طول ما فيك روح)

← السؤال الثاني

❖ لو طلبت تكتب لي كل أملاكك باسمي هاتعمل إيه؟

- 1 - هارميك من البلكونة
2 - هاسيبك جنب الأنبوبة
3 - ها اقتلك
لو إختار أي إجابة من الثلاثة
يبقى صريح..صريح..صريح
وعرفتي تختاري

■ ■ ممنوع الضحك ■ ■

← السؤال الثالث

♥ * عمر ك فكرت تتجوز واحدة ثانية؟

1 - أيون

2 - طبعًا

3 - آه

لو اختار أي حاجة

يبقى صادق يا حبيبي صادق

ومش بيحب الكذب

ما شاء الله عليه

← السؤال الرابع

♥ أنت لسه بتحبني زي زمان؟

1 - لأ

2 - أنت مين أصلًا

3 - ولا أعرفك

■ ■ ممنوع الضحك ■ ■

معلش يا حبيبتى أنت فاجئتيه بالسؤال

ولا كإنك سألتى

عدي على اللي بعده

← السؤال الخامس

♥ إيه أكثر حاجة بتعجبك نيا؟

1 - بتفكريني بربنا كل ما أشوفك

2 - باستغفر ربنا كثير وأنا معاك

3 - الناس بطلت تحسدني

شفتى... طول عمرك متدينة

وقربتيه من ربنا.

← السؤال السادس

♥ إيه رأيك نبي شخصيتي؟

1 - هي فين

2 - طب وريهالي الأول

■ ■ ممنوع الضحك ■ ■

3 - يعني إيه شخصية؟

معلش يا حبيبتى

ما يقدرش يجاوب على حاجة ماشافهاش

إنسان أمين أمين..

طول عمره أمين

خلصنا كده

اطلعي بقى فوق

وإقري الأسئلة الستة دي تانى

وإوعي وإوعي تسألها لجوزك

أبدًا أبدًا

مش كل الكلام يتقال.



■ ممنوع الضحك ■

42

المربحية بالفندقوش

أنا: أنا اشتريت المربحية بالفندقوش.

أنتم: إيه المربحية بالفندقوش دي يا خالتو؟

أنا: حاجة كده جميلة

قوي جدا خالص خالص، شكلها ملفلح، وطعمها زي السراريش،

وريححتها تحفه زي المهايخ

وعليها من فوق دحاليج، وحلوة مع الشاي بلبن.

أنتم: الله!.. أكيد حلوة.. شكلك فرحان يا خالتو

يا ترى بالشوكولاتة دي والللا الكريمة إنتِ أكلتي كام حتة؟

طب عاوزين نأكل وندوق وكده.

■ ■ ممنوع الضحك ■ ■

أنا: في ناس كثير أكلتها ربنا يرزقكم بقى ويحنن عليكم

يا عيني يا مساكين.

أنتم: يا ترى شكلها إيه؟

وإيه السراريش دي؟

ومين الدحاليج دول؟

وروحوا وناموا واحلموا وافتحوا التلفزيون

واتفرجوا على الإعلانات والأغاني والأفلام واسمعوا كام بيت شعر

في وصفها وقصة قصيرة ورواية عن شعورك وأنت بتأكلها.

في جزء منكم هيتخيلها حلويات، والثاني حوادق، والثالث هيشوفها

فطيرة والرابع برايم برايم.

وارفع سقف التوقعات لفوووق لحد ما رجلك تطير في الهوا

واحلم أحلام وردية وخيالية

واحلم معاينة ببكرة جاي ولو ما جاش إحنا نجيبه بنفسنا

■ ■ ممنوع الضحك ■ ■

قوم إيه بقى لما تيجي تأكلها - ورغم إنها حلوة جدا وبما لا يخالف
شرع الله - تقول إيه ده
أنا كنت فاكرها أحلى من كده
ويجيلك إحباط
وممكن تدعي عليّه
أهو ده اللي بيحصل مع الحب والجواز
إتهرينا في الأفلام والمسلسلات وأغاني أم كلثوم وعبد الحليم كلام
في الحب وسيرة الحب وسنين الحب وعذاب الحب
وكل بنت قاعدة مستنيه العريس الوسيم الشاطر
(الشاطر حسن)
ييجي بسلامته راكب حصان أبيض
ويخطفها من أبوها وتعيش في قصر كبير وتلبس فستان واسع
وتغيظ الملكة.

■ ■ ممنوع الضحك ■ ■

أو يكتب فيها شعر ويتشعبط على المواسير
ويطلع لها من البلكونة ويقع فتنكسر رقبتة ويتجوزوا في المستشفى.
والشاب من دول فاكر إنه هيتجوز سندريلا
وهيرجع الظهر يلاقي الأقسام السبعة خلصوا شغل البيت وغسلوا
المواعين وهي الأميرة النائمة وهيصحبها بقبلة رقيقة على جبينها
وهتقوم من النوم مستشورة وحاطة روج ولابسة جزمة.
وسقف التوقعات بيرتفع لفوق أكثر لما بتتكتب قصص الحب وكلام
الحب مع صورة اتنين شكلهم حلو
وهي لابسة ومتأنتكة وهو حاطط جل في شعره وشايلها
أو ماسك مناخيرها مسكة سينيمائية وهي حاضناه وماسكة ودانه.
وبيبص لها بحنان وبتبص له بدلال
(مع الاعتذار لدلال)
وروحوا وناموا واحلموا وافتحوا التلفزيون وانفرجوا على الإعلانات

■ ■ ممنوع الضحك ■ ■

والأغاني والأفلام واسمعوا كام بيت شعر في وصف الحب وقصة قصيرة
ورواية عن شعورك وأنت بتحب.

وتعالى اتجوز

وتعالى إتجوزي

الإنسان اللي اخترتيه وفرحانة بيه وطبعا اللي لسه عايش في
الأحلام ومتوقع شيء خيالي وساب نفسه للمؤثرات المرئية وكلام الناس
والرغي والفتي الكثير ونسي الواقع هيكون شعوره كده زي اللي
أكل المربحية بالفندقوش ولقاها مش حلوة وزى ما كان فاكر..
رغم إنها حلوة وزى العسل.

افهموها صح

«الحب بين الزوجين ليس له قالب واحد ولا نموذج متفرد كل زوجين

لهما حالة خاصة من الاندماج والتفاهم والحب تختلف عن الآخرين

والسعادة مذاقها مختلف من شخصية لأخرى فلا تطبق تجارب

الآخرين على نفسك».

■ ■ ممنوع الضحك ■ ■

الحب مش محتاج أميرة وأمير وملكة جمال وفارس الفرسان.
الحب يعني تحبها بعد الجواز حتى وهي حامل ووشها مورم
وخدودها منفخة.

يعني لو بقى أصلع وبكرش يفضل فارس أحلامك.
يعني مش محتاج يكتب شعر كفاية كفه اللي بتططب على ظهرك
ما هي دي ترجمة كلمة بحبك.

يعني هي جميلة لأنك بتحبها حتى لو هي مش جميلة.
يعني كل لحظة تمر عليكم مع بعض بتعيشوا جوا بعض.
يعني إنت مسجون في روحها حبس انفرادي.
يعني أي بنت حلوة مش هتلفت نظرك؛ لأن قلبك شبعان بحبك
لزوجتك.



مفاجأة

في بيت دافئ كانت ترتجف وهي قلقة على زوجها الحنون، تنتقل
بين نافذة غرفتها والباب وفي يدها الهاتف
وفجأة...

- مساء الخير يا حبيبتي

- مساء الفل يا حبيبي إتأخرت ليه أنا قلقت عليك؟

- أن أن أأاااا مفاجأة

- إيه ده هدية..مش معقولة!

مش مصدقة نفسي.

- آه والله شفتي.. حاجة بقى إنما إيبنيه.

- طب وريني كده.

■ ■ ممنوع الضحك ■ ■

- لأ استني أنا اللي هافتحها علشان ما تبوظيش العلبة.
- طب هات بس ما تخافش.
- قلت لك لأ. لازم أنا.. ده أنا دافع فيها دم قلبي
- طيب بسرعة افتحها أنا فرحانة ربنا يخليك يا حبيبي يارب.
- أهه.. شفتي خاتم ذهب عيار أربعة وعشرين.
- مش شايقة نزل إيدك أنا قصيرة مش شايقة..هات بقى.
- ياااه حا يأكل من إيدك حتة.. مبروك عليك.
- ربنا يخليك يارب.
- بس ما تغسلش بيه المواعين بقى.
- حاضر.
- وخليه للخروج بس لاحسن يتبهدل واللمعان يروح.
- حاضر.
- وشيليه في علبته.
- حاضر.

■ ■ ممنوع الضحك ■ ■

- وفرجيه لمامتك وكده.

- حاضر

وبعد أسبوع..

- ياللا بينا نروح لماما إلبسي بقى وما تنسيش الخاتم اللي جبتھولك

الأسبوع اللي فات.

- حااضر.

- يا رب الأكل النهارده يطلع حلو زي الأكل اللي طبختيھولي يوم ما

جبت لك الخاتم.

- يارب.

وبعد شهر....

- ها يا حبيبي كده لبسي حلو والعباية والطرحه.. شوف كده..

والجزمة والشنطة..أنا حلوة؟

- طبعا فاضل بس تلبسي الخاتم اللي جبتھولك الشهر اللي فات..

ده فرح أختك وكده.

- حااااضر.

خليك في هالك!

- في ناس ما يهمهاش غير نفسها وبس.. مثلا لو قلت لهم:
- في واحد داخ ووقع في الشارع تعالى نفوقه ونوصله بيته.
 - مالناش دعوة كل واهيد في هالوه يا مهبي.
 - السلم مش نضيف وما فيش بواب في العمارة تيجوا كل واحد مننا ينصفه يوم.
 - مالناش دعوة كل واهيد في هالوه يا هنفي.
 - الست اللي في الشارع اللي جنبنا حايطردوها علشان مش بتدفع الإيجار من يوم ما جوزها مات.
 - مالناش دعوة كل واهيد في هالوة يا هوسني.
 - ماما تعبانة وسخنة والمطبخ بقى شبه جبلاية القروود ما تيجي نقوم ننصفه علشان نفرحها.

■ ■ ممنوع الضحك ■ ■

- مالناش دعوة كل واهيد في هالوه يا هلبي.
- أسامة تعبان والامتحان قرب تعالى نزوره ونصور له المحاضرات.
- مالناش دعوة وكل واهيد في هاله يا فتهي.
- في ناس غلابة جعانة كتير تعالى نعمل أكل ونوزعه عليهم.
- مالناش دعوة كل واهيد في هالوه يا هنفي.
- جارتنا ولادها سافروا وبقالها أسبوع مش باينة ما تيجوا نخبط عليها وناخذ لها كيلو برتقان ونزورها يمكن عيانة.
- مالناش دعوة كل واهيد في هالوه يا صبي.
- المسجد عاوز يتنصف تعالوا نكنسه وننصفه ونعطره كده ونخليه فله ونغسل الحمامات قبل يوم الجمعة.
- مالناش دعوة كل واهيد في هالوه يا صاهبي.

عارفينهم الناس دول؟

منهم لله



عش الحب

جاء الصباح وشقشقت العصافير
وغردت البلابل واهتزت الأشجار وطارت الفراشات وعشش الحب
في بيت سعيد
- صباح الخير.
* صباح الفل يا أجمل زوج في الدنيا.
- بأقول لك إيه يا حبيبتى قومي اعملي الشاي وسندوتش جبنة
بطماطم على بال ما ألبس علشان إتأخرت على الشغل.
مش قادرة يا جميل أصلي كان عندي أرق وتعبت بالليل يا حبيبي.
- هو كل يوم أرق!.. ألف سلامة.

■ ■ ممنوع الضحك ■ ■

* روح أنت يا عسول حط البراد الأمور على النار واعمل الشاي.

- حاضر.

بعد شوية..

- أنا نازل.

- إيه الشياكة دي.. أنور وجدي يا خواتي.. مع السلامة.

وبعد الظهر..

- السلام عليكم.

- وعليكم السلام يا أجمل زوج في الدنيا كلها.

- فين الأكل؟ أنا ميت من الجوع.

- طب قبل ما تغير هدومك يا سكر انزل هات لنا

كيلو طماطم حمرة زي خدودك

وكيلو بطاطس مقطقة زي مناخيرك

وكيلو بصل عسول زي ودانك

وكيلو بدنجان إسود زي عيونك

■ ■ ممنوع الضحك ■ ■

- وعلبة سمنة نونو كده وصغننه.
- وماقلتيش ليه الصبح وأنا نازل؟
- أنت من يوم ما مامتك بطلت تبعت أكل ماطبختيش.
- مارضيتش أقلقك يا جميل وقلت لما ترجع.
- طب ما فيش أي حاجة تتأكل في البيت.
- في تونة صغونة روح برجليك الأمورة هتلاقيها في المطبخ العسول
- ويا ريت تغسل المواعين علشان أنا حطيت لك لون المونوكير اللي بتحبه.
- طب تعالي كلي معايه.
- كل أنت بالهنا والشفيا يا جميل.. أنا أكلت ساندويتش لانشون عسوووول
- بالليل...
- هو فين القميص الأخضر؟
- في الغسيل يا حياتي.
- والبنطلون الكاكي؟
- حرقته وأنا باكويه يا روجي.

■ ■ ممنوع الضحك ■ ■

- وشراباتي كلها فين؟
- منورين في الحمام يا نور عيني.
- طب وهتغسلي إمتى.
- ساعدني وحطهم في الغسالة الجميلة المربعة يا غسل وشغلها على بال ما أعمل لك الشاي يا قمر.

تاني يوم..

تك تك تك..

- ميبين؟

- أنا أمك العسولة يا ننوسة

جاية ومعايه أبوك القمر يا ستوتة

علشان ناخذك على بيتنا المحندق على دماغك يا توتة

لأن جوزك المحروس طلقك يا أمورة

حضري شنطتك المقطقة يا نور عيني.



عريس إلكتروني

في بيت دافئ وبينما تقف الأم بين الأبخرة المتصاعدة من الأواني
المختلفة لتتعانق في حنان وحب وتحلق فوق هذا البيت الهادئ دخلت
أميرة على أمها وهي تصيح...
- أماه لقد جاءني عريس
- الحمد لله يا ابنتي لقد هرمننا في انتظار العريس المطلوب
- نعم أخيرًا يا أمي كم أنا سعيدة
- والله لقد طلع من عيني الاثنتين العريس الذي رفضتیه الأسبوع الماضي.
- لا تحزني يا أماه، فهذا أفضل منه
ويقول أنه معجب بشخصيتي المنظمة وتفكيري المرتب

■ ■ ممنوع الضحك ■ ■

- اتنيلي على عينيك يا ابنتي الحبيبة واذهبي أولاً ورتبي غرفتك
ومشطي شعر رأسك

- حاضر يا أمي كفاك صياحًا يا غالية أين المحروس بسلامته أخي؟
- وأين سيكون مثلاً! على الأريكة في غرفته يشاهد التلفاز.

- سأذهب لأشاهد معه برنامج (العرب لهم مواهب) فأنا أشجع
المشترك الذي يغني

(بالإنجليزية)

- يا خبيتك الثقيلة أي موهبة عربية تلك وهو لا يغني بلغته الأم!
- لأنه يتيم..أأ أقصد.. صوته الرائع هو المهم.

- جاءتهم ستون خيبة أين الهوية العربية في المواهب!
- موجودة يا أمي فالحفلة في بلد عربي.. العالم تغير يا أماه نحن
في عصر الإنترنت.

- ليته ما تغير.. حتى اسم البرنامج مكتوب بالإنجليزية واسم
القناة التي تعرض الحلقات بالحروف الإنجليزية والمواهب أمريكية..

■ ■ ممنوع الضحك ■ ■

- يا أمي أقصد رسالة إلكترونية مكتوبة.
- وماذا قلت له يا فالحة؟
- سألني عن عمري ودراستي واسم أبي وعنوان عمله وعنك... إلخ إلخ.
- يا وقعتك السوداء.. يا نهارك الذي لن يفوت.. وأخبرته كل شيء.
- لا يا أمي طبعًا ولكن أرسلت صورتني فقط
- حسنًا حسنًا.. ويا خبر بنقود غدًا سيكون مجانًا، ومتى سيأتي يا فلذة كبدي؟
- لا أعرف
- هل عنده شقة؟
- لا أعرف
- هل هو مستعد ماديًا؟
- لا أعرف
- كم عمره؟

■ ■ ممنوع الضحك ■ ■

- لا أعرف
- وماذا يعمل؟
- لا أعرف... لكنه ناشط سياسي
- يا حسااااااااااااااام
- نعم يا أمي
- حبة الضغط من الدرج الثاني وعصاة المكنسة من خلف باب المطبخ يا ولدي الغالي.
- حالاً يا غالية.
- النجددددددة



منتهى الحب

- عاوز أتكلم معاكِ شوية ممكن؟
- * طبعًا حاليًا هانشر بس قمصانك علشان يلحقوا ينشفوا
- طيب بالمرّة اغسلي البنطلون الكحلي ولمعي لي الجزمة علشان نازل بالليل.
- حاضر من عيوني.
- يالا جيت أهه هاكوي وأنت بتكلمني القميص اللبني اللي كنت لابسه أول يوم في شهر العسل.. فاكر.
- خلصتي؟
- أنا جيت أهه خير؟

■ ■ ممنوع الضحك ■ ■

- لأ قومي رضعي الولد ونيميه علشان مش عاوز دوشة
- خلاص نام خير يا حبيبي.. عسول وهو نايم وشبهك خالص
- ترررن.. جرس الباب
- ممكن تفتح؟
- لا رجلي منملة.. افتحي أنتِ الباب
- ثواني هاخذ الحاجات من البواب وراجعة لك.
- وأنت رايحة هاتي لي الموبايل وطفى المروحة وناوليني القهوة.
- حاضر.
- حبيبي أنا خلصت ممكن توديني لماما بكره وأنت نازل.
- لأ
- ليه بس
- كفاية مرة كل أسبوعين
- طيب ممكن سحر تيجي تزورني

■ ■ ممنوع الضحك ■ ■

- لأ
- ليه
- لأنها هاتقعد تحكي لك على الكلية وتزعلي إنك ما كملتيش وإحنا قلنا مش هاتكلمي خلاص دراسة علشان البيت والولاد.
- طيب عاوزه مصروف ممكن؟
- هاتعملي بيه إيه إنتِ مش بتخرجي وأنا باجيب كل حاجة.
- كان نفسي في مجلة كده أجيبها من المكتبة وأخذ توتو أمشيهِ شوية في عربيته الصبح يعني.
- مالهاش لازمة.. بلاش مصاريف
- طيب ممكن تخرج معايا.
- هانروح فين؟
- نزور أي حد أو نتمشى
- هي البلد فيها حاجة تتراح

■ ■ ممنوع الضحك ■ ■

- وديني الحتت اللي بتروحها كل يوم
- مش وقته.. رايحة فين أنا عاوز أتكلم معاكي
- أنا جيت أهه، خير يا حبيبي؟
- هاخذ رأيك في حاجة ماشي
- اتفضل.. بس غريبة أول مرة تسألني رأيي في حاجة؟ يا ترى إيه؟
- حاجة من حقي ومش عيب ولا حرام
- خير يا حبيبي
- أنا عاوز أتجوز زوجة تانية
- إيه!



حماتك

ما تزعليش

من حماتك لو بصت لك كثير

وبحلققت يوم ما جت تخطبك

إبنها اللي قالها بصي يا ماما معايه لأنه بيتكسف

مش قصدها تبص كده.

ما تزعلش

لو حماتك قابلت (جوز أخت مراتك) بترحاب أكثر

ممکن يكون دخل العيلة قبلك بست سنين وواخدين عليه أكثر

ويمكن أكبر سنا

■ ■ ممنوع الضحك ■ ■

يمكن إنت أحسن فيبراضوه نفسيا ويمكن علشان حاجات بتفوت عليك..

خد بالك

ما تزعلش

لو حماتك ما أكلتش الكيك اللي مامتك قدمته

الكيك حلو بس هي مكسوفة

طيبة على فكرة.. سيبك من اللي حصل في المسلسل

ما تزعلش

لو مرة حماتك قالت كلمة زعلتك

فوتها.. ما هي اللي علمت مراتك الفاتحة والصلاة

وابنك الكبير حفظها من أمه يعني كل سجدة من ابنك في ميزان

حسنات حماتك

وبيدعي لك فيها.. شفت بقى.

ما تزعلش

■ ■ ممنوع الضحك ■ ■

لو حماتك حكّت لك عن مشكلة بنتها مع خطيبها مش قصدها
تعمل إسقاط سياسي على خطوبتكم على فكرة هي بتفضفض
وحتى لو كانت قاصدة طنشي.
ما تزعلش
لما حماتك زعلت منك وتقول لك أنت مش مدلع بنتي..
أصلها ما شافتش الفرحة في عنينا كويس..
شافتكم وأنتم تعبانين بس
بينوها شوية وراضي زوجتك وطبّط عليها وسط أهلها علشان يوم
ما هي تشتكي يقفوا معاك ويعقلوها.
ما تزعلش
إن حماتك بتتكلم على ابنها كتير وبتشكر فيه.. أصلها شالته على
قلبها تسع شهور وبتحبه قوي
زي مامتك ما بتموت في أخوك

■ ■ ممنوع الضحك ■ ■

وزي ما بتحبي إبنك كده..

يعني حنة منها.

ما تزعلش

لو قالت لك الفراخ اتهرت والبامية مش حلوة.. إيه يعني.. قوليلها
هو أنا هعرف أطبخ زيك يا ست الكل علميني... واعملي نفسك مهتمة
واكتبي أي حاجه واتصلي بيها مرة واللا اتنين واسألني على أكلة حتى لو
ما عملتيهاش وشوفي هتحبك إزاي.

ما تزعلش

من حماتك لما بتلومك..

أصلها متعشمة فيك خير ومنتظرة كلمة حاضر..

يمكن كلامها غلط

ويمكن رأيها مش صح

بس أنت تقدر تطيب خاطرها

■ ■ ممنوع الضحك ■ ■

بكلمتين وبالعقل وتعمل اللي أنت شايفه صح.

ما تزعليش

لو ما حبتكيش زي بنتها..

أصل بصراحة كمان مش بتحبها زي مامتك.. آه والله

خلي كل حاجة في مكانها

أمك ما حدش هيحبك حبها ومش هتتعوض.

ما تزعلش

لو ما حبتكش زي ابنها اللي من لحمها ودمها..

على فكرة دي بني آدمه وكبرت وعجزت وتعبت وضحت

مش العدو اللدود

لازم تحترم وتحترمي مشاعرها

(خدوا بالكم قوي من اختلاف الفكر والتعليم والثقافة والبساطة

وعاملها على قد إدراكها وسنها).

■ ■ ممنوع الضحك ■ ■

ما تخليهاش تحس إنها خلاص راحت عليها وهتشيلها في الصندرة
هتخطها في كرتونة على الرف
وتبص عليها كل أسبوع مرة
وفي العيد تطلعها وتلمعها
ويوم الأم تجيب لها شنطة وتخطها المسكينة جنب الشنطة والشنطة
سهلوها واتفقوا مع بعض
هات خطيبتك أو مراتك واتفقوا اتفاق
هأقول لمامتك يا
(ماما)
وهتقولي لأمي يا
(ماما)
هنبرهم سوا ونسهل على بعض
وفي حضور أمي هاراضيها على حسابك معلش ساعديني بكلمتين..

■ ■ ممنوع الضحك ■ ■

أشكري معاهه فيها وفي تربيتها ونضافتها وأكلها

وخليها تحس إنها ملكة..

وبلاش نشتكي من بعض.. خلينا نشتكي لبعض منا

وفي بيتنا لما نرجع يا زوجتي إنتِ الملكة

ويا ريت قبلها يكون في البيت هو الملك.



■ ■ ممنوع الضحك ■ ■

49

كلام في الحب

بيقولوا الحب بعد الجواز مش موجود، وإن الخطوبة أجمل فترة

في الحياة

وإن..وإن..وإن

لأ..طبعا

الحب مش وردة وقلب وغنوة وشوكولاتة وورد وبنت حلوة

الحب بيتترجم لأفعال إيجابية يمكن مش بتشوفوها.. بس

هاتحسوها

طب.. قولوا أنتم بلاش أنا

بابا وماما طول النهار قدامكم صح؟ فاكرين يوم ما بابا اتأخر لما

■ ■ ممنوع الضحك ■ ■

كان مسافر ماما وقفت إزاي تستناه رايحة جاية؟

بصيتوا لوشها؟

شفتوا الخوف والقلق والفرع؟

سمعتوا دقات قلبها وهي خايفة؟

ما هو ده الحب

إنك تخاف على حبييك من الخطر

شفتوا بابا وهو شايل شنطة سفر

ومعاد الطائرة بعد ساعة

وقلبه بيتقطع وهو بيبوس رأس ماما وبيمشي ودموعه بتجرى على

خده.. أول مرة تشوف بابا بيعيط

صح؟

ما هو ده الحب

إنك تكره فراق حبييك

■ ■ ممنوع الضحك ■ ■

علشان غالي عليك قوي وبقي حتة من جواك
فاكر لما ماما كانت عيانة وحرارتها عالية وبابا واقف فى المطبخ
بيطبخ بدالها وهو راسم على وشه ابتسامة حنان
ابتسامة موجوعة
ومخنوقة بألم
ما هو ده الحب
إنك تتألم لألم حبيبك لأنك مش عاوزه يتوجع
شفتى بابا لما مر بظروف صعبة أد إيه كانت ماما واقفة معاه
واستحملت حاجات كتير
ما هو ده الحب
على الحلوة والمرّة..
وساعات من حلاوة الحب المرارة بتروح وتلاقي الحبيب راضي
بحال حبيبه حتى لو بيشحت

■ ■ ممنوع الضحك ■ ■

فاكر لما ماما فضلت واقفة تصحى بابا علشان صلاة الفجر وراسها
كانت بتقع وفضلت لحد ما قام وصلى
ما هو ده برده الحب
إنك تخاف على حبيبيك من نار جهنم.
مش تكون سبب فى دخوله نار جهنم
يبقى الحب مش رغبة جسدية فقط
ومش بنكرها
وديننا الحمد لله بيوجه الغرائز صح
«الحب..حنان ومودة ورحمة مع بعض وموجود جوانا فعلاً، هايطلع
هايطلع إن شاء الله، بس كل شيء بأوان».

* * *

ممنوع الضحك

صباح مشرق.. استيقظت على صوت المنبه فقممت بنشاط، أحياناً
أكاد أسمع صوت مفاصلي الخشنة وركبي وهي تسلم على بعضها،
أحاول تعديل استقامة عمودي (الفأري)
وأألم قليلاً، لابد أن السبب هو اللبن الرائع الذي أتناوله بطعمه
الجميل بعد أن تزيل الشركة كل ما فيه من فائدة مرات ومرات.. يعجبني
شكل العلبة!

فتحت صنوبر المياه وغسلت وجهي بماء النيل العكر الأصفر الجميل
ومسحت يدي بملوثاته الرائعة واستمتعت بطعم الماء العجيب
الصدىء وأنا أتمضمض..

تناولت إصبعاً من الموز المسرطن وتناولته ثم ضغطت زر الغلاية لأنتقم

■ ■ ممنوع الضحك ■ ■

منها وأبدأ يومي بقوة، اتخذت قراراً مفيداً وصنعت لنفسي كوباً من الشاي باللبن الممزوج بمياه النيل المفسفة التي ربما لو نطق الفلتر للطم وحسبن وحوقل مما فلتره منها، وأخاله سيدعو علينا كل يوم كلما استخدمناه.

اقتربت من النافذة واستمتعت بالضوضاء اللطيفة فالشارع رائع والسيارات تتوقف فيه من روعته أكثر من مرة وجميل أن تتأمل وجوه الركاب المكفهرة وهم يستمتعون بالزحام والحر وعلى وجوههم تتلألأ وتصطف قطرات العرق المملح.

أمامي بعيداً مدرسة ابني الجميلة والكبيرة والمشهورة لا أنسى أبداً رائحة حماماتها المنعشة وأصوات المدرسين والمدرسات وهم يتابعون أولادنا بأرقى الألفاظ،

وبأصوات رحيمة من حناجرهم المباركة.

وأكوام القمامة المبدعة المتكتلة في الطريق الجانبي إليها وأنا أسير مع ابني رغم رقي المنطقة!

راقبت ذات مرة رجلاً وامرأة، يفتشان في القمامة بحثاً عن الكنوز التي خبأتها الليلة لهما في طيات الأكياس العبقرية السوداء، يمزقان

■ ■ ممنوع الضحك ■ ■

الأكياس، وينشرون البهجة أمام المدرسة، ويعبر من فوقها المارة بحنان.
تذكرت تجمع الأمهات كل يوم، قبل موعد انصراف التلاميذ وكم هو
مبدع مهرجان الأزياء الذي أراه كل يوم أتردد فيه على بوابة المدرسة، ألوان
بديعة، وبناطيل متعددة الأشكال مع طرح مزركشة، وطلاء الأظافر الأخضر
المتناسق مع الطبيعة والحقائب البديعة.. صحوه دينية ومنظر خلاب
ولفت نظري الجو العكر بسحره، والغبار الجميل المنتشر في كل مكان.
رأيت الأشجار الخضراء، والتي بدت لي كعجوز لطيفة، في الستين
وقفت بهوان وعليها مسحة من الجمال الغير لافت للنظر، بعد أن
تساقطت أوراقها النضرة.

كم أنت جميلة يا بلدي الحبيبة، لا أدري لماذا يشكون منك!
ترى هل سنستطيع الذهاب إلى المصيف هذا العام؟
تساءلت في نفسي.. فكم أشتاق للسير على الرمال المختلطة بالقمامة
وأقف وأنا أراقب الشاطيء الجميل وأمواجه تحمل لنا زجاجات
المياه الفارغة التي ألقاها الناس فيه وبعض الأكياس والمناديل الورقية.
فتحت موقع الفيسبوك وقلبت فيه، وقرأت مزيجًا من الأخبار

■ ■ ممنوع الضحك ■ ■

الخفيفة بين فيديو لصحفي فقد نصف وزنه ورأيت كيف تحلقت عيناه بالسواد ووهن بعد دخوله السجن لفترة طويلة فليتهم يعتقلون كل من يزيد وزنه عن السبعين..

وبين لقطات مصور ماهر لإحدى القرى ليرينا طبيعة سكانها الجميلة والعملية فقد استغنوا عن كل شيء من أثاث وطعام ويختبئون في أشياء تشبه الكهوف الرائعة.

وخبر من هنا عن زوجة لا تعلم أين زوجها حتى الآن فقد رأته آخر مرة من تسعة أشهر على شاشة التلفاز.. يبدو أن هناك من يعتمد إخفاء أخباره عنها لتشتاق إليه.

وخبر من هناك عن شاب يبتسم وعرفت أنه الآن بإذن الله مشغول بعرضه في السماء.

سعدت جدًا بقرب عودة التوقيت الصيفي الرائع!

وسعدت أكثر بفرحة صديقاتي به!

قرأت مقالات واستمتعت ببعض التشبيهات اللفظية، والاستعارات المكنية، والتصويرية، والتمثيلية، والتنوين والكثير من الإبداعات وخاصة في

■ ■ ممنوع الضحك ■ ■

الحوارات السياسية الخلافية، ألفاظ بدیعة هنا وهناك..

إبداع..

أتابع بإعجاب الحب المنتشر بين أفراد الشعب، وألاحظ زيادة الوعي، واتساع مساحات التناغم بين التيارات المختلفة.

الواقع مبهج، وأنا متفائلة جداً فنحن نتغير للأفضل، الكل يضحك.. ويضحك، راقبوا الوجوه جيداً أيها السادة.

الكثير من الدعوات تتصاعد يومياً، ومعظمها في السجود،

لكل من يسعدونا وأسعدونا بأفعالهم الرائعة، أرجوكم توقفوا قليلاً

فقد غمرتنا السعادة، ولتمنعوا هذا النوع من الضحك.



و. حنا للآس
ألم البنس

■ ■ ممنوع الضحك ■ ■

فهرس المحتويات

5	إهداء
7	مقدمة
9	1. إزاي تبسط مراتك
14	2. أفكار رومانسية
19	3. احترس من المرأة
23	4. عبارات تسمعنها من زوجك
27	5. ألو.. بحبك
32	6. رمضان كريم يا ستات
37	7. رمضان كريم للرجال
42	8. عبقرية الستات

■ ■ ممنوع الضحك ■ ■

9. شايفاك 45
10. شايفاك 49
11. جبر الخواطر 52
12. تعرفي إزاي إن جوزك يبحك 55
13. حاجات ما تتنسيش 59
14. حصاد الغربية 63
15. الليلة الأخيرة 66
16. الشيخة فيفي 70
17. حوار دسم جداً (أفكار ملظظة) 74
18. عريس بوسي 80
19. سامح 85
20. الملافظ سعد 90
21. عروسة المولد 96

■ ■ ممنوع الضحك ■ ■

22. عريس بوسي 80
23. سامح 85
24. الملافظ سعد 90
25. عروسة المولد 96
26. وجع 99
27. أهلاً أهلاً بالزوار 102
28. بنت ناس 108
29. مشية الستات 112
30. الشاويش عطية 116
31. غلطة 120
32. نوع نادر جداً 125
33. نصائح لأم العريس 128
34. لظلوظة الماظرظة 134

■ ■ ممنوع الضحك ■ ■

- 137 35. لما يجيلك عريس
- 142 36. ست العرايس
- 148 37. هؤلاء مروا من هنا
- 159 38. احترس من المهلبية
- 164 39. أشياء تعين على غض البصر
- 170 40. كلام للمكلبطين
- 174 41. احتفال بريء
- 179 42. حقك عليه
- 184 43. تيكيلام تيكلام تيكلام
- 187 44. الوردة الحمراء
- 190 45. في الركن البعيد الهادي
- 195 46. المربحية بالفندقوش
- 201 47. مفاجأة

■ ■ ممنوع الضحك ■ ■

205	48 . خليك في هالك!
207	49 . عش الحب .
211	50 . عريس إلكتروني
216	51 . منتهى الحب .
220	52 . حماتك
227	53 . كلام في الحب
231	54 . ممنوع الضحك
236	فهرس المحتويات